

四庫全書

史部

欽定四庫全書

欽定續通志卷六十七

元紀十一

明宗

文宗

明宗皇帝諱和實拉武宗子也母伊奇哩氏武宗生二子長即帝次圖卜特穆爾成宗無子武宗入繼大統立弟仁宗為皇太子約以次傳於帝及仁宗即位乃立英宗為太子於是封帝為周王出鎮雲南置常侍府官屬

以遷授中書左丞相圖古勒大司徒鄂爾多中政使尚
嘉努山北遼陽等路蒙古軍萬戶博羅翰林侍講學士
嘉琿等並為常侍中衛親軍都指揮使唐古兵部尚書
賽罕巴圖爾為中尉仍置諮議記室各二員俱遣就鎮
帝至延安圖古勒尚嘉努博囉及武宗舊臣哩日沙布
駝哈瑪爾圖等皆來會嘉琿謀曰天下者我武皇之天
下也出鎮之事本非帝意由特們德爾及左右構間致
然請以其故白行省俾聞之朝廷庶可杜塞離間遂與

數騎馳去先是阿斯罕為太師特們德爾奪其位出為
陝西行省丞相及嘉琿等至即與平章政事塔齊爾行
臺御史大夫圖魯卜中丞托歡悉發關中兵分道自潼
關河中府而東已而塔齊爾托歡中變襲殺阿斯罕嘉
琿於河中帝遂西行至北邊金山西北諸王察克台等
咸率衆來附帝至其部與定約東每歲冬居扎延夏居
阿魯噶察山春則命從者耕於約尼十餘年間邊境寧
謐及英宗嗣位以帝遠居沙漠不足忌而特克實等復

構帝弟圖卜特穆爾徙之瓊州英宗遇弒晉王以大宗
入繼泰定元年改封圖卜特穆爾為懷王命居建康致
和元年三月徙居江陵七月泰定帝崩於上都都爾蘇
專權自用踰月不立君朝野疑懼時簽樞密院事雅克
特穆爾留守京師乃謀舉義八月甲午黎明召百官集
興聖宮兵皆露刃號於衆曰武皇有聖子二人孝友仁
文天下歸心大統所在當迎立之不從者死乃縛平章
額卜德呼勒巴延徹爾二人下中書左丞托多參知政

事王士熙等於獄雅克特穆爾與西安王喇特納實哩
固守內廷以帝遠在沙漠猝未能至慮生他變乃迎帝
弟懷王於江陵且宣言已遣使北迎帝以安衆心復矯
稱帝所遣使者自北方來云周王從諸王兵南下且夕
即至矣丁巳懷王入京師九月壬申懷王即位於大都
是為文宗改元天歷時都爾蘇在上都立泰定帝子喇
實晉巴為帝改元天順遣兵分道攻大都而梁王旺沁
右丞相達實特穆爾御史大夫寧珠太尉布哈等兵皆

次於榆林雅克特穆爾與其弟薩都子騰吉斯等帥師與戰屢敗之上都兵皆潰十月辛丑齊王伊魯特穆爾元帥布哈特穆爾以兵圍上都都爾蘇乃奉皇帝寶出

降

事詳文宗紀

兩京道路始通於是文宗遣哈克織及薩題

等相繼來迎帝遂發北邊諸王及舊臣博囉尚嘉努哈瑪爾圖皆從至金山武寧王齊齊克圖簽樞密院事特穆爾布哈繼至乃命博囉如京師諸王舊臣爭先迎謁所至成聚天歷二年正月乙丑文宗復遣中書左丞伊

爾特穆爾來迎乙酉薩題等至入見帝於行幄以文宗
命勸進丙戌帝即位於和寧之北乃遣薩題等還京師
命之曰朕弟曩嘗覽觀書史邇者得無廢乎聽政之暇
宜親賢士大夫講論史籍以知古今治亂得失卿等至
京師當以朕意諭之二月壬辰宣靖王邁努自京師來
覲辛丑追尊皇妣伊奇哩氏曰仁獻章聖皇后是月文
宗立奎章閣學士院於京師遣人以除目來奏帝並從
之三月辛酉文宗遣右丞相雅克特穆爾奉皇帝寶來

上御史中丞巴濟拉知樞密院事圖勒噶特穆爾等各率其屬以從四月癸巳雅克特穆爾見帝於行在率百官上皇帝寶帝嘉其勲拜太師仍命為中書右丞相開府儀同三司上柱國錄軍國重事監修國史達爾罕太平王並如故復諭雅克特穆爾等曰凡京師百官朕弟所用者並仍其舊卿等其以朕意諭之雅克特穆爾奏國家大事所繫者中書省樞密院御史臺而已宜擇人居之帝然其言以武宗舊人哈瑪爾圖為中書平章政

事前中書平章政事拜特穆爾知樞密院事常侍博囉
為御史大夫甲午立行樞密院命昭武王赫伯知樞密
院事和碩領行樞密院事賽音特穆爾邁努並同知行
院事是日帝宴諸王大臣於行殿雅克特穆爾哈瑪爾
圖拜特穆爾博囉等侍帝諭臺臣曰太祖有訓美色名
馬人皆悅之然方寸一有繫累即能壞名敗德卿等居
風紀之司亦嘗念及此乎天下國家譬猶一身上中書樞
密左右手也左右手有病治之以良醫省院闕失不以

御史臺治之可乎凡諸王百司違法越禮一聽舉劾風紀重則貪墨懼猶斧斤重則入木深其勢然也朕有闕失卿等亦以聞朕不爾責也乙未特命博羅等傳旨宣諭諸司曰世祖皇帝立中書省樞密院事御史臺及百司庶府其治天下大小職掌已有定制世祖命廷臣集律令章程以為萬世法成宗以來列聖相承罔不恪遵成憲朕今居太祖世祖所居之位凡省院臺百司庶政詢謀僉同標譯所奏以告於朕軍務機密樞密院當即

以聞母以夙夜為間而稽留之其他事務果有所言必先中書院臺其下百司及摯御之臣母得隔越陳請儻違朕意必罰無赦丁酉以陝西行臺御史大夫特穆爾圖為上都留守辛丑文宗立都督府於京師遣使來奏又以臺憲官除目來上並從之癸卯遣使如京師卜日命中書左丞相特穆爾布哈攝告即位於郊廟社稷遣武寧王齊齊克圖及哈瑪爾圖立文宗為皇太子仍立詹事院以徹爾特穆爾為中書平章政事奇爾濟蘇為

中書右丞乙巳監察御史言嶺北行省控制一方廣輪
萬里實為太祖肇基之地國家根本繫焉方面之寄豈
可輕任平章塔奇濟素非勲舊奴事都爾蘇崛起宿衛
輒為右丞俄升平章年已七十眊昏殊甚左丞瑪們本
晉邸部民以女妻都爾蘇引為都水遂除左丞郎中羅
里市井小人圖魯庫乃晉邸衛卒不諳政務並宜黜退
臺臣以聞帝曰御史言甚善其並黜之五月戊午封特
穆爾為保德郡王辛酉御史大夫博羅中政使尚嘉努

並特授開府儀同三司典四番宿衛庚午命雅克特穆爾升用嶺北行省官吏其餘並賜散官一級選用潛郎舊臣及扈從士受制命者八十有五人六品以下二十

有六人壬申封額琳沁巴勒為柳城郡王

按元史諸王表琳沁巴勒

封柳城郡王在天曆三年與紀不符

以巴濟拉為陝西行臺御史大夫仲

嘉努為御史中丞乙亥敕大都省臣鑄皇太子寶時求太子故寶不知所在乃命更鑄之丁丑皇太子發京師諸王駙馬及扈衛百官悉從行戊寅京師市馬二百八

十匹載乘輿服御送行在所已邛加翰林學士承旨唐古為太尉壬午左丞相特穆爾布哈等以帝即位攝告南郊六月丁亥朔特穆爾布哈等以帝即位攝告於宗廟社稷戊子雅克特穆爾等奏中政院越中書省擅奏除授移文來徵制敕已如所請授之然於大體非宜乞申命禁止庶使政權歸一從之壬寅戒近侍毋得輒有奏請辛亥召諭中書省臣凡國家錢穀銓選諸政大事先啟皇太子然後以聞是月特穆爾布哈以久旱啟於

皇太子辭相位乞更選賢德委以燮理皇太子遣使以
聞帝諭奇爾濟蘇等曰修德應天乃君臣當為之事特
穆爾布哈所言良是天明可畏朕未嘗斯湏忘於懷也
皇太子來會當與共圖其可以澤民利物者行之卿等
其以朕意諭羣臣七月丙辰朔日有食之壬申監察御
史巴勒丹伊實言朝廷自去秋命將出師戡定禍亂其
供給軍需賞賚將士所費不可勝紀若以歲入經賦較
之則其所出已過數倍況今諸王朝會舊制一切供億

俱尚未給而陝西等處饑饉荐臻餓殍枕藉加以冬春之交雪雨愆期麥苗槁死秋田未種民庶遑遑流移者衆臣伏思之此正國家節用之時也如果有功必當賞賚者宜視其官之崇卑而輕重之不惟省費亦可示勸其近侍諸臣奏請恩賜宜悉停罷以紓民力帝嘉納之仍敕中書省以其所言示百司丙子授皇太子寶壬午遣使詣京師敕中書平章政事哈瑪爾圖同翰林國史院官致祭太祖太宗睿宗三朝御容發諸衛軍六千完

京城八月乙酉朔次翁果察圖之地丙戌皇太子入見是日宴皇太子及諸王大臣於行殿庚寅帝暴崩年三十葬起輦谷諡曰翼獻景孝皇帝廟號明宗國語曰胡土克圖皇帝後至元六年十月加上尊號曰順天立道睿文智武大聖孝皇帝

明宗一年

即文宗天
歷二年

文宗皇帝諱圖卜特穆爾武宗次子明宗弟也母唐古氏延祐中仁宗封明宗為周王命鎮雲南而帝尚留京

師至治元年中政使耀珠告托歡徹爾等交通親王將
構異圖於是出帝居於瓊州泰定初召帝北還行至潭
州復止之居數月乃還大都改封懷王仍命出居建康
以殊祥院使額森紐爾掌其衛士時都爾蘇為相狠悞
自用災異數見而帝兄弟播越南北人心思之致和元
年春泰定帝出畋柳林以疾還宮諸王們都阿穆爾台
太常禮儀使噶海宗正扎爾古齊庫庫楚等與簽樞密
院事雅克特穆爾謀曰主上之疾日臻今且往上都如

有不諱吾黨扈從者執上都諸王大臣殺之居大都者
即縛大都省臺官宣言武宗子當正位傳檄諸闕守帥
則大事濟矣三月泰定帝如上都們都庫庫楚等從西
安王剌特納實哩居守雅克特穆爾亦留大都於時額
森紐爾私至上都與都爾蘇等圖弗利於帝乃復遷帝
居江陵七月泰定帝崩於上都都爾蘇及梁王旺沁遼
王托克托結黨害政人皆不平之時雅克特穆爾掌大
都樞密符印謀於西安王剌特納實哩集百官告以欲

立武宗二子意即遣前河南行省參知政事明琦克棟
阿前宣政使達爾瑪實哩馳驛迎帝於江陵密以意諭
河南行省平章政事巴延令簡兵以備扈從是日推前
湖廣行省左丞相拜布哈為中書左丞相太子詹事塔
斯哈雅為中書平章政事

按塔斯哈雅為平章政事元史宰相表載在九月與紀異

前湖廣行省右丞蘇蘇為中書左丞前陝西行省參知
政事王布琳濟達為樞密副使與中書右丞趙世延同
簽樞密院事雅克特穆爾翰林學士承旨伊拉齊通政

院使哈沙分典機務調兵守禦關要徵諸衛兵屯京師
出府庫犒軍士乙未以西安王令給宿衛京城軍士鈔
有差調諸衛兵守居庸關及盧兒嶺丙申遣左衛率使
圖魯將兵屯白馬甸隆鎮衛指揮使阿都瑪勒將兵屯
泰和嶺丁酉發中衛兵守遷民鎮又遣薩里布哈等往
迎帝且令達實特穆爾矯為使者自南來言帝已次近
郊使民無驚疑戊戌徵宣靖王邁努諸王雅克布哈於
山東己亥徵兵遼陽明埒克棟阿至汴梁執行省臣皆

下之獄又收廉訪司萬戶府及郡縣印庚子發宗仁衛
兵增守遷民鎮辛丑遣萬戶徹爾特穆爾將兵屯河中
癸卯雅克特穆爾之弟薩敦子騰吉斯自上都來歸河
南行省殺平章庫哩右丞拜特穆爾是日明埒克棟阿
等至江陵甲辰帝發江陵遣使召鎮南王特穆爾布哈
威順王庫春布哈湖廣行省平章政事高昌王特穆爾
布哈來會執湖廣行省左丞瑪哈穆特送京師以布色
代之乙巳遣隆鎮衛指揮使伊蘇岱爾將兵守碑樓口

河南行省殺其參政圖卜台召陝西行臺侍御史滿濟爾噶台及行省平章政事特默齊不至丙午諸王阿固察至京師遣前西臺御史喇嘛凱巴等諭陝西丁未以薩都守居庸關騰吉斯屯古北口戊申帝命河南行省平章政事巴延為本省左丞相河南行省遣前萬戶博囉等將兵守潼關己酉諸王們都阿穆爾台宗正扎爾古齊庫庫楚前河南行平章政事瑪魯集賢侍讀學士烏魯斯布哈太常禮儀院使噶海齊等十八人謀附雅

克特穆爾事覺都爾蘇殺之庚戌帝至汴梁巴延等扈
從北行以前翰林學士承旨鄂博哈雅為河南行省平
章政事發平灤民塹遷民鎮以禦遼東軍辛亥以雅克
特穆爾知樞密院事伊拉齊為御史中丞癸丑上都諸
王及用事臣以兵分道犯京畿甲寅喇嘛凱巴等至陝
西皆見殺乙卯托克托穆爾及上都諸王實喇平章政
事奈曼台詹事奇徹戰於宜興斬奇徹於陣禽奈曼台
送京師戮之實喇脫走丙辰雅克特穆爾等奉法駕郊

迎丁巳帝至京師入居大內戊午以蘇蘇為中書平章
政事前御史中丞曹立為中書右丞江浙行省參知政

事張友諒為中書參知政事

按元史宰相表蘇蘇為平章在九月張友諒為參政

在十月曹立為右丞表不載

河南行省左丞相巴延為御史大夫中

書右丞趙世延為御史中丞己未以河南萬戶伊蘇岱

爾同知樞密院事上都梁王旺沁右丞相達實特穆爾

太尉布哈平章政事瑪魯御史大夫寧珠等以兵次榆

林隆鎮衛指揮使黑漢謀附上都殺之籍其家九月庚

申朔雅克特穆爾督師居庸關遣薩都以兵襲上都兵於榆林敗之追至懷來而還隆鎮衛指揮使阿都瑪勒以兵襲上都諸王穆爾特穆爾特默齊於托囉克台執之歸於京師陝西兵入河中府劫行用庫鈔萬八千錠殺同知府事布琳圖壬戌命蘇蘇宣諭中外曰昔在世祖以及列聖臨御咸命中書省綱維百司總裁庶政凡錢穀銓選刑罰興造罔不司之自今除樞密院御史臺其餘諸司及左右近侍敢有隔越中書奏請政務者以

達制論監察御史其糾言之以高昌王特穆爾布哈知
樞密院事額森紐爾為宣徽使召雅克特穆爾赴闕上
都諸王額森特穆爾平章圖們岱爾自遼東以兵入遷
民鎮諸王巴刺瑪額森特穆爾以所部兵入管州殺掠
吏民丁郊雅克特穆爾率諸王大臣請早正大位以安
天下帝固辭曰大凡在朔方朕敢荼天序乎雅克特穆
爾曰人心向背之機間不容髮一或失之噬臍無及帝
曰必不得已必明著朕意以示天下而後可乃遣薩都

拒遼東兵於薊州東流沙河元帥教拉守居庸關上都
軍攻碑樓口指揮使伊蘇岱爾禦之不克戊辰以大司
農明埒克棟阿大都留守庫庫台並為中書平章政事
命襄陽萬戶楊克忠鄧州萬戶孫節以兵守武關已巳
鑄御寶成立行樞密院於汴梁以同知樞密院事伊蘇
岱爾知行樞密院事將兵行視太行諸關西擊河中潼
關軍上都諸王呼喇白等引兵犯崞州庚午遣軍民守
歸峽諸隘辛未帝常服謁太廟額卜德呼勒特默格棄

市托多王士熙巴延徹爾托歡等各流於遠州並籍其
家同知樞密院事托克托穆爾與遼東圖們岱爾戰於
薊州兩家店壬申帝即位於大明殿詔以致和元年為
天歷元年大赦仍詔天下曰謹俟大兄之至以遂朕固
讓之心癸酉命雅克特穆爾將兵擊遼東軍封雅克特
穆爾為太平王以太平路為食邑中書右丞曹立為江
浙行省平章政事福建廉訪使伊實棟阿為右丞前中
書左丞張思明為左丞甲戌雅克特穆爾加開府儀同

三司上柱國錄軍國重事中書右丞相監修國史依前
知樞密院事巴延加太尉徵左右兩阿蘇衛軍老幼赴
京師不行者斬籍其家乙亥上都旺沁兵襲破居庸關
闕兵皆潰雅克特穆爾軍次三河丙子旺沁游兵至大
口雅克特穆爾還軍次榆河帝出齊化門視師丁丑還
宮戊寅諭中外曰近以姦臣都爾蘇額卜德呼勒潛道
陰謀變易祖宗成憲既已明正其罪凡回回種人不預
其事者其安業勿懼有因而扇惑者罪之敕軍中逃歸

及京城游民敢攘民財者斬命留守司完京城軍士乘
城守禦雅克特穆爾與旺沁前軍戰於榆河敗之

按雅克特

穆爾傳榆河之戰在己卯日與紀異

追奔至紅橋北其樞密副使阿拉克

特穆爾指揮使呼圖克特穆爾以兵會旺沁復來戰又
敗之辛巳以拜布哈知樞密院事依前中書左丞相雅
克特穆爾與上都軍大戰於白浮之野敗之托克托穆
爾與遼東軍戰於薊州之檀子山壬午大霧旺沁等遁
崑山州獲上都頒詔使者及遼東徵兵使者以聞詔誅

之癸未以同知樞密院事圖爾噶特穆爾知樞密院事

中書平章政事明埒克棟阿為江浙行省平章政事

按元

史宰相表明埒克棟阿未嘗出為行省平章蓋
擊未有是命至乙酉即復留之中書也謹識

旺沁收

集散亡復來迎戰薩敷托克托穆爾夾擊敗之追及於

昌平北又大敗之靖安王扣布哈等將陝西兵潛由潼

關南水門入分據陝州乙酉以明埒克棟阿為中書平

章政事嶺北行省左丞雅克布琳知樞密院事上都兵

入古北口分掠石槽雅克特穆爾遣薩都由昌平倍道

襲擊之

按薩都倍道趨石槽雅克特穆爾傳載在丙戌日與紀吳

復自以大兵繼至

轉戰至牛欄山

牛欄山元史本紀作牛頭山考昌平山水記順義縣有牛欄山與石槽同在縣

之西北又遼史百官志有牛欄都統領司亦因山得名以今道里計之適相符合謹據改

擒駙馬博

囉特穆爾平章蒙古達實伊實特穆爾

按達實伊實特穆爾係二人蓋

達實以蒙古人官平章其明

証也原文脫伊實二字今增將作院使蘇爾塔琿送闕

下戮之托克托穆爾與遼東軍戰薊州南屢敗之調河

南蒙古軍五萬人增守京師臨清萬戶府運糧軍三千

五百並御河分守山東丁壯萬人守禦益都般陽諸處

海港丁亥遼東軍京城雅克特穆爾引兵拒之募丁壯
乘城守禦戊子上都諸王呼喇台等入紫荆關行樞密
院官布延阿都瑪勒指揮使伊蘇岱爾以兵援之陝西
行臺御史大夫額森特穆爾引兵從大慶關渡河擒河
中府官殺之河東官吏皆棄城走額森特穆爾悉以其
黨代之召雲南行省左丞相額爾吉訥不至冬十月己
丑朔雅克特穆爾引兵至通州擊遼東軍敗之遣托克
托穆爾等將兵援紫荆關調江浙兵禦潼關河南行省

調兵守虎牢關庚寅雅克特穆爾與遼東軍夾潞水而陣遼東軍宵遁辛卯紫荆關兵進逼涿州同知州事嘉琿達調丁壯禦之壬辰額森紐爾以軍至保定殺阿里沙等及張景武兄弟五人癸巳呼喇台游兵進逼南城令京城戶出壯丁一人持兵仗從軍士乘城仍於諸門列甕貯水以防火雅克特穆爾及陽翟王太平國王多羅台等戰於檀子山之棗林斬太平於陣甲午托克托穆爾章吉特與額森紐爾合擊上都軍於良鄉轉戰至

盧溝橋乙未雅克特穆爾率軍循北山西趣良鄉時諸將與呼喇台阿拉克特穆爾等戰於盧溝橋聲言雅克特穆爾大軍至上都兵潰遣使頒詔至陝西陝西省臺官械使者送上都湘寧王巴拉實哩引兵入冀寧救萬戶和尚將兵由故關援之會上都兵大至和尚退保故關冀寧遂陷戊戌命湖廣行省平章政事奇珠調兵守歸峽左丞布色守八番以禦四川軍諸將追阿拉克特穆爾等至紫荊關獲之送京師皆棄市己亥圖們岱爾

軍復入古北口雅克特穆爾與戰於檀州南敗之走還
遼東辛丑以同知樞密院事托克托穆爾通政使額布
勒並知樞密院事御史中丞伊拉齊為御史大夫齊王
伊魯特穆爾東路蒙古元帥布哈特穆爾等以兵圍上
都都爾蘇等奉皇帝寶出降梁王旺沁遁遼王托克托
為齊王伊魯特穆爾所殺遂收上都諸王符印喇實晉

巴不知所終

按泰定帝乃裕宗嫡孫晉王長子於屬為
宗子非不當立也英宗遇弒既不與其謀

又為諸王所迎立即位之初即立喇實晉巴為太子至
是五年名分已定圖卜特穆爾遣兵攻之以致於死史

不明言其致死之由然所以致之死地者誰也伏請通鑑輯覽

批謂圖卜特穆爾攜變竊位兵犯上都賈與弒逆無異洵為春秋直筆謹錄識之

壬寅以宣徽使

額森紐爾知行樞密院事副使章吉特為行樞密院副使與知樞密院事伊蘇岱爾等將兵西擊潼關軍癸卯額森特穆爾軍至晉寧本路官皆遁甲辰晉邸及遼王所轄路府州縣達魯噶齊並罷免禁錮選流官代之丙午中書省臣言凡有罪者既籍其家貲又沒其妻子非古者罪人不孥之意今後請勿没人妻子從之丁未以

中書平章政事塔斯哈雅為大司農復以奇徹台為中書平章政事侍御史伊魯布哈為中丞以度支芻豆經用不足凡諸王駙馬來朝並節其給宿衛官已有廩祿者及內侍宮人歲給芻豆皆權止之陝西兵至鞏縣黑石渡遂據虎牢已酉陝西軍奪武關萬戶楊克忠等兵潰庚戌帝御興聖殿齊王伊魯特穆爾等奉上皇帝寶都爾蘇等從至京師下之獄分遣使者檄行省內郡罷兵癸丑雅克特穆爾辭知樞密院事命其叔父東路蒙

古元帥布哈特穆爾代之覈上都倉庫錢穀命御史臺
擇人充各道廉訪司官遣官賑良鄉涿州定興保定驛
戶之被兵者甲寅元帥伊蘇岱爾執相寧王巴拉實哩
及趙王滿濟勒噶諸王呼喇台於馬邑歸於京師遣使
止江浙軍士之往潼關者就還鎮額森特穆爾兵至潞
州丙辰特默格兵入鄧州丁巳毀顯宗室戊午詔諭廷
臣曰凡今臣僚唯丞相雅克特穆爾大夫巴延許蕪三
職署事餘者並從簡省百司事當奏者共議以聞或私

任已意者不許獨請上都官吏自八月二十一日以後
擢用者並追收其制敕天下僧道有妻者皆令為民額
森紐爾軍次順德盜殺太尉布哈十一月己未重給內
外百司印命太保博迪蘇總兵北邊給遼東降軍行糧
遣還庚申汰近歲白身入官者辛酉額森紐爾兵至武
安額森特穆爾以軍降河東州縣盡殺其所署官吏癸
亥帝宿齋宮甲子服兗冕享於太廟辛未特默格兵入
襄陽知縣谷庭珪主簿張德死之癸酉雅克特穆爾言

向者上都舉兵諸王實喇樞密同知阿齊拉等十人南望宮闕鼓譟其黨拒命逆戰情不可恕詔各杖一百七流之遠方甲戌安置泰定后昂吉爾氏於東安州丁丑荆王伊蘇額布根遣使傳檄至襄陽特默格引兵走庚辰遣使奉迎周王於漠北以中政院使敬儼為中書平章政事同知樞密院事徹爾特穆爾為中書左丞壬午以御史中丞伊魯布哈為中書右丞癸未都爾蘇伏誅磔其尸於市旺沁亦賜死瑪哈穆特寧珠薩題勒密實

額森特穆爾等皆棄市甲申命威順王庫春布哈還鎮湖廣丙戌遣諸衛兵各還鎮左丞相拜布哈罷四川行省平章囊嘉特自稱鎮西王以其省左丞托克托為平章前雲南廉訪使楊靜為左丞殺其省平章庫春等官稱兵燒絕棧道十二月丙申如大宗恩福元寺謁武宗神御殿御史臺臣言額森紐爾將兵所至擅殺官吏俘掠子女貨財詔籍其家杖之竄於南寧庚子大赦追賜諸王們都為果王阿穆爾台為毅王宗正扎爾古齊庫

庫楚等十七人並賜功臣號及階官爵謚仍命有司刻其功於碑賜鈔卹其家中書省臣言陝西行省行臺官焚棄詔書坐罪當流雖經赦宥永不錄用為宜從之乙巳巴延加太尉開府儀同三司與伊拉齊並為御史大夫戊申加巴延為太保知樞密院事布哈特穆爾為太尉希沙為司徒甲寅復遣治書侍御史薩題內侍布延特古斯奉迎周王於漠北丁巳封西安王剌特納實哩為豫王賜南康路為食邑以徹爾特穆爾為右丞參知

政事伊爾特穆爾為左丞參議省事趙世安為參知政事戊午免被兵郡縣雜役弛山場河漑之禁私貸者俟秋成責償蒙古色目人願丁父母憂者聽如舊制是月復遣使者召雲南行省左丞相額爾吉訥不至

天歷二年

按文宗得位本為不順然泰定之子立未踰年明宗又未改元元之統緒不得以屬之

伏讀

批通鑑輯覽書法大義昭垂謹錄識之

春正月庚申封知

樞密院事和碩為昭武王辛酉封圖烈特穆爾復為楚王高昌王特穆爾布哈為中書左丞相大司農王毅為

平章政事奇徹台知樞密院事武寧王齊齊克圖遣使
來言周王啟行之期乙丑中書省言度支今歲芻橐不
足常例支給外凡陳乞者宜勿予從之丁丑四川囊嘉
特攻破播州貓兒埡隘庚辰賜潛邸說書劉道衡等官
辛巳起復中書左丞史惟良為御史中丞上都官吏惟
初入仕及驟升者黜之餘聽叙復壬午以陝西行臺御
史大夫鄂博哈雅為中書平章政事周王遣常侍博羅
及特節齊先至京師賞以金幣居宅仍遣內侍屯嘉瑋

往迎癸未遣宣靖王邁努如周王所丙戌周王即皇帝
位於和寧二月己丑曲赦四川囊嘉特庚寅雅克特穆
爾復為中書右丞相辛卯帝御大明殿立妃鴻吉哩氏
為皇后壬辰囊嘉特據維武闕奪三义柴關等驛癸巳
遣翰林侍講學士曹元用祀孔子於闕里囊嘉特以書
誘鞏昌總帥汪延昌丁酉囊嘉特以兵至金州據白工
闕陝西行省督軍禦之樞密院言囊嘉特阻兵四川其
亂未已請命鎮西武靖王綽斯本等皆調兵以湖廣行

省官托歡布色博囉及鄭昂霄總其兵進討從之戊戌
命祭罕淖爾宣慰使薩題勒密實將本部蒙古軍會鎮
西武靖王等討四川頒行農桑輯要及栽桑圖辛丑中
書省議追尊皇妣伊奇哩氏曰仁獻章聖皇后唐古氏
曰文獻昭聖皇后命有司具冊寶丙午囊嘉特分兵逼
襄陽湖廣行省調兵鎮播州及歸州辛亥帝謂廷臣曰
薩題還言大兄已即皇帝位凡二月二十一日以前除
官者速與制敕後凡銓選其詣行在以聞甲寅立奎章

閣學士院以翰林學士承旨和塔拉都哩默色集賢大學士趙世延並為大學士侍御史薩題翰林直學士虞集並為侍書學士三月辛酉遣雅克特穆爾奉皇帝寶詣明宗行在復命有司齎金千五百兩銀七千五百兩幣帛各四百匹及金腰帶二十以備賜予癸亥命造乘輿服御北迎大駕改潛邸所在諸路名建康曰集慶江陵曰中興瓊州曰乾寧潭州曰天臨戊辰雲南諸王達竇布哈圖沁布哈及平章默古斯等集衆五萬數丞相

額爾吉訥專擅十罪將殺之額爾吉訥遁走八番達實
布哈等偽署參知政事等官壬申以去冬無雪今春不
雨命中書及百司官分禱山川羣祀設奎章閣授經郎
二員以勲舊貴戚子孫及近侍年幼者肄業

按元史百
官志設授

經郎在至順
元年與紀異

乙亥置行樞密院以山東都萬戶伊蘇岱

爾知行樞密院事與湖廣河南兩省官進兵平四川伊
蘇岱爾以病不往夏四月己丑時享於太廟辛卯命伊
爾特穆爾王布琳濟達代伊蘇岱爾討四川布琳濟達

以母老辭同簽樞密院事傅巖起請往從之士辰浚郭
州漕運河已亥湖廣行省參知政事博囉奉詔至四川
赦囊嘉特等罪囊嘉特等聽命蜀地悉定諸省兵皆罷
癸卯明宗遣武寧王齊齊克圖中書平章政事哈瑪爾
圖來錫命立帝為皇太子丙午封博囉布哈為鎮南王
戒諸王分邑達魯噶齊受代不得仍留官所其父兄所
居官子弟不得再任辛亥賑鄧州諸縣被兵逃戶糧士
子賑通州諸縣被兵民並令有司護送被俘者歸其家

五月己未遣翰林學士承旨額琳特穆爾北迎明宗甲戌命中書省臣擬注中書六部官奏於行在所丙子改儲慶使司為詹事院丁丑帝發京師北迎明宗戊寅次於大口庚辰次香水園六月丁酉特穆爾布哈以旱乞避宰相位諭之曰皇帝遠在沙漠未能即至是以暫攝大位今亢陽為災皆予闕失所致汝其勉劾厥職祇修實政庶可以上答天變仍命馳奏於行在庚戌次於上都之六十里店壬子賜鳳翔府岐陽書院額祀周文憲

聖

御

王仍命設學官春秋釋奠如孔子廟儀秋七月丙辰朔
日有食之丁巳次上都之三十里店己未更定遷徙法
凡應徙者驗所居遠近移之千里在道過赦皆得放還
所遷人死妻子聽歸土著著為令辛巳令諸王封邑達
魯噶齊推擇本部識達治體廉慎無過者以充或有冒
濫罪及王傅八月乙酉朔明宗次於翁果察圖丙戌帝
入見明宗宴帝及諸王大臣於行殿庚寅明宗暴崩雅
克特穆爾以明宗后命奉皇帝寶授於帝遂還

伏讀通鑑輯覽

批謂圖卜特穆爾非能護國之人其推奉周王特以其序次居兄恐為公論所不容故陽為勸進以飾人耳目冀其固遜而後取之則既弋虛名復享厚實此逆賊本懷也周王不察誠偽遽受尊稱遂兆翁果察圖之禍圖卜特穆爾固罪無可逃周王亦智不足以保身矣

論昭揭既可以正當時君臣之罪又可以見作史者不敢

明言之非
謹錄識之

壬辰次博囉察罕以巴延為中書左丞相奇

徹台阿爾斯蘭哈雅趙世延並中書平章政事甘肅行

省平章多爾濟為中書右丞中書參議阿榮太子詹事

丞趙世安並中書參知政事前右丞相達實特穆爾知

樞密院事特穆爾布哈及上都留守特穆爾圖並為御

史大夫癸巳帝至上都丙申流諸王呼喇珠於海南戊戌四川囊嘉特以指斥乘輿坐大不道棄市己亥帝復即位於上都大安閣大赦庚子命阿榮趙世安督造建康龍翔集慶寺甲辰遣奇徹台先還京師經理政務雅克特穆爾阿榮留上都監給恩賚金幣發諸衛軍浚通惠河丁未以滿濟勒噶台為上都留守戊申封諸王庫春為肅王己酉車駕發上都庚戌改詹事院為儲政院以巴延兼儲政使中政使哈扎爾布哈太子詹事丞賽

音約蘇前儲慶使姚煒並儲政使

按巴延傳於是年二月加授儲慶使此時

詹事院未立也四月明宗罷儲慶司仍立詹事至是復改為儲政巴延亦係改授不特姚煒一人為前儲慶使

也謹識

甲寅置隆祥總管府總監大承天護聖寺工役前

丞相拜布哈坐潛與日者推測聖算命安置集慶九月

乙卯朔市故宗太后全氏田為大承天護聖寺永業已

未立龍翔萬壽營繕提點所海南營繕提點所隸隆祥

總管府

按百官志海南營繕提點所作規運提點所與紀異

庚申加封故領諸路

道教事張留孫為上卿大宗師輔成贊化保運神德真

君辛酉命凡前往明宗行在所送寶官吏越次超升者皆從黜降丁卯大駕至大都戊辰敕翰林國史院官同奎章閣學士采輯本朝典故準唐宋會要著為經世大典敕使者頒詔赦率日行三百餘里既受命逗留三日及所至飲宴稽期者治罪取賂者以枉法論癸酉帝御大明殿受諸王百官朝賀丙子特穆爾布哈加錄軍國重事以翰林學士承旨額爾吉訥元帥梁國公圖烈納並知行樞密院事論額森紐爾以不忠不敬伏誅壬午

封知樞密院事雅克布琳為興國公以大司農卿雅齊為司徒癸未建顏子廟於曲阜所居陋巷冬十月甲申朔帝服袞冕享於太廟辛卯立元江宣慰司於雲南封太禧宗禋使圖沁特穆爾為梁國公甲午中書省臣言舊制朝官以三十月為一考外任則三年為滿比年朝官率不久於其職或數月即改遷於典制不類且治蹟無從考驗請如舊制為宜敕除風憲官外其餘朝官不許二十月內遷調命江西湖廣分漕米四十萬石以紓

江浙民力辛丑詔諸王公主官府寺觀撥賜田租除魯國大長公主聽遣人徵收外其餘悉輸於官給鈔酬其直戊申以江淮財賦都總管府隸儲政院供皇后湯沐之用徵托多王士熙等十二人於貶所放還鄉里庚戌以親祀太廟禮成詔天下罷大承天護聖寺工役囚在獄三年疑不能決者釋之民間拖欠官錢無可追徵者盡行蠲免命通政院官分職往所在官司僉補逃亡驛戶大都至上都諸驛供給繁重官為應付免徵奉元路

民間商稅一年命所在官司設置常平倉雲南八番為
囊嘉特所誣誤反側未安者並賞其罪免各處煎鹽竈
戶雜泛夫役二年免永平屯田總管府田租申禁天下
私殺馬牛十一月丙辰詔列聖諸宮后妃陪從之臣永
給衣廩芻粟戊午以多爾濟亦都護為河南行省丞相
癸亥以翰林學士承旨庫春貝知樞密院事位居衆知
院事上巳巳以薩題為中書右丞命中書左丞趙世安
提調國子監學丁丑造青木綿衣萬領賜圍宿軍


舊制
大朝

會時皇城外皆無牆垣
故用軍圍繞名曰圍宿

已卯翰林國史院臣言纂修英

宗實錄請具都爾蘇款伏付史館從之高麗國王王燾
久病不能朝請命其子楨襲位十二月甲申以西僧年
扎克策喇實為帝師詔僧尼徭役一切無有所與丙戌
詔百官言朝政得失錄所上章疏善者即議舉行庚寅
以摩濟為大司徒定風憲官赴任毋拘遠近均給驛乙
未詔諸僧寺田自金宗所有及累朝賜予者悉除其租
其有當輸租者仍免其役僧還俗者聽復為僧壬寅命

江浙行省印佛經二十七藏丁未罷土番巡捕都元帥
府戊申以伊魯布哈為御史大夫兼領隆祥總管府事



欽定續通志卷六十七

欽定四庫全書

史部

欽定續通志卷六十八

主事臣尹壯圖覆勘

總校官原任侍講臣王燕緒

欽定四庫全書

欽定續通志卷六十八

元紀 十一

文宗

寧宗

至順元年春正月丁巳以知樞密院事拜特穆爾為遼陽行省左丞相丁卯雲南諸王圖沁及萬戶布呼阿哈奇徹等叛攻中慶路陷之殺廉訪司官辛未中書省臣言科舉會試日期舊制以二月一日三日五日近歲改

為十一十三十五請依舊制從之癸酉以宣徽使薩都

復知樞密院事與竒徹台並領長密卿

按元史百官志無長密卿樞密

院亦無卿名惟長信寺及長秋寺設卿應係長信或長秋之誤他無可考謹仍原文而識之

丁丑遣

使齋金千五百兩銀五百兩詣杭州書佛經己卯封太

醫院使阿哩雅為秦國公辛巳改大都田賦提舉司為

宣農提舉司荆襄田賦提舉司為荆襄濟農香戶提舉

司平江提舉司為平江善農提舉司

按元史百官志改三提舉司俱係二

年事與紀異

二月壬午朔以趙世安為御史中丞史惟良為

中書左丞癸未加知樞密院事雅克布琳開府儀同三
司籍張珪子五人家貲乙酉以西僧嘉勒斡藏布卓特
巴嘉勒燦並為烏斯藏土番等處宣慰使都元帥丁亥
命江南陝西河南等處富民輸粟補官有差四川富民
有能輸粟赴江陵者依河南例其不願仕乞封父母者
聽僧道加以師號己丑圖沁布呼等攻陷仁德府至馬
龍川調八番元帥諤勒哲禦之庚寅以修經世大典久
無成功專命奎章閣額哩音特穆爾和塔拉都哩默色

等譯國言所紀典章為漢語纂修則趙世延虞集等雅克特穆爾如國史例監修辛卯奎章閣學士和塔拉都哩默色薩題虞集辭職詔諭之曰昔我祖宗睿知聰明其於致理之道自然生知朕以統緒所傳實在眇躬夙夜憂懼自惟早歲跋涉艱阻既乏生知之明於國家治體豈能周知故立奎章閣置學士員日以祖宗明訓古昔治亂得失陳說於前使朕樂於聽聞卿等其悉所學以稱朕意其勿復辭甲午圖沁布呼等攻晉寧州圖沁

自立為雲南王布呼為丞相阿哈呼刺呼等為平章等
官立城柵焚倉庫以拒命丁酉帝及皇后皇子刺特納
達刺並受佛戒己亥命明宗皇子受佛戒監察御史言
中書平章道拉實職任台衡不思報效銓選之際紊亂
綱紀貪污著聞恬不知恥黜罷為宜從之甲辰流旺沁
之子於吉陽軍乙巳封明宗子琳沁巴勒為郕王丙午
復以阿爾斯蘭哈雅為江南行臺御史大夫命中尚卿
蘇爾約蘇以兵討雲南御史臺臣言竒徹台天歷初在

上都常與庫庫楚等謀執都爾蘇事泄同謀者皆死奇
徹台以出征獲免頃臺臣疑而劾之不稱事情宜雪其
枉從之丁未以巴延知樞密院事依前太保錄軍國重
事帝以雅克特穆爾有大功欲獨相以尊異之諭省臣
曰昔在世祖嘗以宰相一人總鎮庶務故治出於一今
雅克特穆爾為右丞相巴延既知樞密院事左丞相其
勿復置戊申以太禧宗禋使鄂博哈雅為中書平章政
事命史惟良及參知政事和尚總督建言之事中書省

臣言舊制正旦天壽節內外諸司各有贊獻頃者罷之
今江浙省臣言聖恩公溥履幬無疆而臣等殊無補報
凡遇慶禮進表稱賀請如舊制為宜從之詔諭樞密院
以屯田籽粒鈔萬錠助建佛寺免其軍卒土木之役辛
亥命市故瀛國公趙鼎田為大龍翔集慶寺永業御史
臺臣言不必予其直帝曰吾建寺為子孫黎民計若取
人田而不予直非朕志也三月丁巳徙封濟陽王瑪納
濟為吳王吳王普爾普為濟陽王戊午封皇子喇特納

達喇為燕王立宮相府總其府事以雅克特穆爾領之
以河南行省平章竒珠為雲南行省平章八番順元宣
慰使特穆爾布哈為雲南行省左丞從豫王由八番道
討雲南賜明宗近侍七十人官有差己巳議明宗升祔
序英宗上視順宗成宗廟遷劄辛未封知樞密院事布
哈特穆爾為武平郡王壬申奉玉冊玉寶祔明宗神主
於太廟甲戌封諸王斯隆瑪為西寧王

按元史諸王表
斯隆瑪封西寧

王在至順二
年與紀異

夏四月丙戌封額爾勤額布根為桓國公

戊子四川行省調重慶五路萬戶以兵救雲南壬辰以所籍張珪諸子田四百頃賜大承天護聖寺為永業卒

丑明宗后班布爾實崩

皇后謀殺之也

壬寅括益都般陽寧海

閒田十六萬二千九十頃賜大承天護聖寺為永業立

益都廣農提舉司及益都般陽寧海諸提領所並隸隆

祥總管府烏蒙土官祿余殺烏撒宣慰司官吏降於布

呼羅羅諸蠻俱叛與布呼相應平章特穆爾布哈死之

戊申雲南賊祿余以蠻兵七百餘人據烏撒順元界立

關固守命諸王溫都遜特穆爾與湖廣平章托歡會兵討之五月戊午羣臣上尊號曰欽天統聖至德誠功大文孝皇帝改元己未羅羅斯權土官宣慰撒加伯阿漏土官阿刺里州土官德益叛附於祿余辛酉四川行省進軍討之戊辰車駕發大都以額哩音特穆爾為大司徒遣豫王喇特納實哩出鎮西番加趙世延翰林學士承旨封魯國公辛未置宣忠扈衛親軍都萬戶府總俄羅斯軍士隸樞密院以太禧宗禋使伊拉齊為中書平

章政事甲戌八番乖西解苗阿馬察伯秩等萬人侵擾
邊境詔樞密臣分兵討之乙亥置順元宣撫司統達喇
齊軍征雲南六月丙戌帝至上都丙申立行樞密院討
雲南賜給驛璽書十五銀字圓符五以河南行省平章
徹爾特穆爾知行樞密院事陝西行省平章特默齊近
侍嘉琿為同知副使發朶甘斯圖沙瑪及鞏昌諸處軍
萬三千人人乘馬三匹徹爾特穆爾同鎮西武靖王綽
斯本等由四川嘉琿從豫王喇特納實哩等由八番分

道進軍庚子以內侍中瑞卿薩里為大司徒知樞密院
事庫春貝托克托穆爾通政使濟爾噶朗翰林學士承
旨嘉琿達巴延額布根燕王官相嘉琿達烏魯斯中政
使尚嘉努托噶台右阿蘇衛指揮使諾海徹爾拜珠以
謀變棄市籍其家乙巳羅羅斯土官撒加伯合烏蒙蠻
兵萬人攻建昌縣雲南右丞伊爾特穆爾擊敗之四川
軍亦敗撒加伯於蘆古驛秋七月辛亥封諸王阿固察
為廣寧王乙丑以翰林學士承旨額爾吉訥知樞密院

事庚午中書省臣言近歲帑廩虛空其費有五曰賞賜
曰作佛事曰創置衙門曰濫冒支請曰續增衛士鷹坊
請與樞密院御史臺各集寮官同加汰減從之丁丑故
丞相特們德爾子將作使索珠與其弟觀音努姊夫太
醫使雅爾烏坐怨望造符錄祭北斗呪咀事覺詔中書
鞫之辭連前刑部尚書烏瑪喇前御史大夫博囉上都
留守瑪勒及雅爾烏姊烏訥實密遜等俱伏誅閏月庚
辰朔封諸王瑪展為永寧王辛卯以陝西行臺御史中

丞托音納爾為中書參知政事趙世延以年老罷癸巳
以伊嚕特穆爾為大司徒命雅克特穆爾以鈔萬錠分
賜天歷初諸王羣臣死事之家戊戌甘肅平章奈曼台

封宣寧郡王

按元史諸王表是年封宣寧郡王者為額哩音特穆爾與紀異

駙馬錦濟

勒封鄆國公並知行樞密院事乙巳雲南使來報捷遣
使賜雲南四川省臣行樞密院臣以上尊戊申加封孔
子父齊國公叔梁紇為啟聖王母魯國太夫人顏氏為
啟聖王夫人顏子充國復聖公會子邲國宗聖公子思

沂國述聖公孟子鄒國亞聖公河南伯程顥豫國公伊陽伯程頤洛國公八月辛亥雲南伊爾特穆爾以兵屯建昌執羅羅斯把事曹通斬之己未大駕至京師壬申詔興舉蒙古字學九月甲申監察御史葛明誠劾遼陽行省平章哈喇特穆爾嘗坐贓被杖罷之辛卯監察御史多羅台王文若言嶺北行省平章哈瑪爾圖鄙俚無知理宜黜罷從之癸巳置麓川路軍民總管府復立總管府於哈喇和卓甲午封魏王阿穆爾克子阿嚕為西

靖王乙未以立冬祀五福十神太一真君丙午史惟良
辭歸賜鈔二百錠丁未以中書參知政事張友諒為左
丞知樞密院事圖卜台為陝西行臺御史大夫冬十月
戊申朔降璽書申飭行聖公崇奉孔子廟事壬子立宣
忠扈衛親軍都萬戶營於大都北市民田百三十餘頃
賜之戊午致齋大明殿己未遣亞獻官中書右丞相雅
克特穆爾終獻官特穆爾布哈率諸執事告廟請以太
祖皇帝配享南郊庚申出次郊官辛酉帝服大裘袞冕

祀昊天上帝於南郊以太祖皇帝配禮成是日大駕還

宮

按元自世祖至是七世凡有大祀皆遣官攝行惟此始親祀謹識

十一月辛巳陝西

行省左丞齊刺坐受人僮奴一人及鸚鵡御史臺論如律帝曰位至宰執食國厚祿猶受人生口理宜罪之但鸚鵡微物以是論賊失於太苛其從重者議罪嗣後凡饋禽鳥者勿以贓論著為令甲申知樞密院事雅克布琳請依舊制全給鷹坊芻粟使毋貧乏帝曰國用皆百姓所供當量入為出朕豈以鷹坊失所重困吾民哉不

從辛卯以庫庫台知樞密院事辛丑徵河南民自實田糧不通舟楫者許以鈔代十二月己酉以董仲舒從祀孔子廟位列七十子下國子生積分及等者省臺集賢院奎章閣官同考試中式者以等第試官不中者復入學肄業辛亥立燕王喇特納達喇為皇太子甲寅監察御史言昔裕宗由燕邸而正儲位世祖擇耆舊老臣如玉顥姚燧蕭軫等為之師保賓客今皇太子仁孝聰睿出自天成誠宜慎選德望老成學行純正者俾之輔導

於左右以宏養正之功實宗社生民之福也帝嘉納之
癸亥知樞密院事庫庫台兼大都留守甲戌御史中丞
和尚坐受婦人為賂遇赦原罪監察御史言和尚所為
貪縱有污臺綱罪雖見原理宜追奪所受制命禁錮原
籍終其身從之敕各行省凡遇邊防有警許令便宜發
兵事緩則驛聞

二年春正月己卯行樞密臣言去歲十一月仁德府權
達嚕噶齊庫楚糾集兵衆以討雲南首敗布呼賊兵於

馬龍川以是月十一日殺布呼弟巴延獻馘於豫王十
三日戰於馬金山獲布呼及其弟巴延徹爾其黨拜布
哈布延特穆爾等十餘人誅之餘兵皆潰獨祿余猶據
金沙江有旨趣進兵討之庚辰任持大承天護聖寺僧
寶峯加司徒癸未立侍正府以總近侍丙戌巴延伊嚕
特穆爾伊嚕布哈鄂博哈雅等十四人並以本官兼侍
正按巴延傳加侍正
在八月與紀異丁亥命後衛指揮使史墳往四川
行省調軍官選戊子命努圖克齊阿里和卓按行北邊

牧地以晉邸部民劉元良等二萬四千餘戶隸壽安山大昭孝寺為永業戶中書省臣言四川省臣達春圖卜特穆爾等討雲南以去歲十一月九日領兵至烏撒周泥驛明日祿余阿奴阿答等賊兵萬餘自山後間道潛出達春圖卜特穆爾等進擊屢戰敗之十五日又戰七星關六日凡十七戰賊大敗潰去詔遣使以銀幣賞之罷益都等處廣農提舉司改立田賦總管府仍令隆祥總管府統之辛卯皇太子喇特納達喇薨壬辰御史臺

臣劾奏福建宣慰副使哈濟前為廣東廉訪副使貪污狼籍宜罷黜從之甲辰敕每歲四祭五福太一星建孔子廟於後衛乙巳封蒙古巫者所奉神為靈感昭應護國忠順王號其廟曰靈祐鎮西武靖王綽斯本豫王喇特納實哩及行省行院官同討雲南阿哈就擒斬於軍前遂復行省治分兵追捕殘賊於嵩明州樞密院臣以捷聞詔總兵官量度緩急從宜區處二月丙午以上都留守奈曼台行崩北行樞密院事太禧宗禋使錦濟勒

達朗達爾瑪聶呼四人並知院事遙授平章政事戊申
立廣教總管府以掌僧尼之政凡十六所四川行省招
諭懷德府驢谷什用等四洞及生蠻十二洞皆內附詔
升懷德府為宣撫司以鎮之諸洞各設長官司及巡檢
司且命各還所掠生口壬子以中書平章政事伊拉齊
兼瀋陽等路安撫使燕王宮相巴咱爾為中書平章政
事陝西行臺中丞多爾濟巴勒為中書參知政事戶部
尚書高履亨兩淮都轉運鹽使許有壬並參議中書省

事乙卯雲南統兵官來報捷諸蠻悉降唯祿余追捕未獲命番休各衛漢軍十之二以三月一日放遣庚午創建五福太一宮於京城乾隅修上都洪禧崇壽等殿諸王齊齊克圖沙格坐妄言不道詔安置齊齊克圖廣州沙格雷州三月辛巳御史臺臣劾奏燕南廉訪使布札爾前為閩海廉訪使受贓計鈔二萬二千餘錠金五百餘兩銀三千餘兩男女生口二十二入及它寶貨無算雖遇赦原乞追奪制命籍沒流竄詔如所言仍暴其罪

示天下壬午命喇特納實哩沙津阿固齊

按喇特納實哩沙津阿固

齊原文倒置據續通鑑綱目及至順三年本紀改

為三藏國師賜玉印甲申御

史臺臣言奎章閣參書雅勒呼阿媚奸臣所為不法宜
罷其職從之丙戌司徒希沙言陶弘景胡笳曲有負宸
飛天歷終是甲辰君之語今陛下生年紀號實與之合
此實受命之符乞錄付史館頒告中外翰林諸臣議唐
開元間太子賓客薛讓進武后鼎銘云上玄降監方建
隆基為玄宗受命之符姚崇表賀請宣示史官頒告中

外而宋儒司馬光斥其采偶合之文以為符瑞乃小臣之諂而宰相實之是侮其君也今陛下應天順人紹隆正統於今四年薄海內外罔不歸心固無待於旁引曲說以為符命從其所言恐啟讖緯之端非所以定民志也事遂寢戊子以西僧蘇尼德巴迪爾班迪為三藏國師賜金印癸巳詔累朝神御殿之在諸寺者各製名以冠之名亳州太清宮道士馬道逸汴梁朝天宮道士李若訥河南嵩山道士趙亦然各率其徒赴闕修普天大

醜監察御史劾江浙行省平章通荒佚宴安才非輔
佐詔免其官豫王喇特納實哩鎮西武靖王綽斯本等
擒雲南諸賊額默根羅羅托克托穆爾博勒巴居激江
路總管羅羅布哈布呼之叔沁達噶偽署萬戶哈喇岱
爾及諸將校悉斬之磔尸以徇己亥御史臺臣劾奏大
都總管劉原仁稱疾久不視事及遷同知儲政院事即
就職僥倖巧官避難就易詔罷之癸卯御史臺臣劾奏
工部尚書蘇炳性行貪邪詔罷之夏四月丙午朔全寧

民王托歡獻銀鑛詔設銀場提舉司隸中政院中書樞
密議定天歷兵興諸領軍與敵戰者功賞詔加雅克特
穆爾及巴延寶帶金銀有差庚戌御史臺臣言平章政
事曹立累任江浙今雖閒廢猶與富民交納宜遣還其
本籍大同路又監察御史萬嘉律嘗薦中丞和尚托音
托嘗舉廉訪使布扎爾今和尚布扎爾俱以贓罪除名
萬嘉律托克托不宜任臺省之職並從之壬子命雅克
特穆爾總制官相都總管府事額布勒巴咱爾俱以本

官兼宮相都總管府都達魯噶齊乙卯鎮西武靖王綽
斯本等已平雲南各遣使來報捷諸王圖烈納鎮雲南
品甸自以貲力給軍協力討賊詔以襲衣賜之戊午以
集慶路玄妙觀為大元興崇壽宮命興和建屋居海青
上都建屋居鷹鵠庚申特命河南儒士吳炳為藝文監
典簿仍予對品階辛酉御史臺臣言儲政使哈扎爾布
哈侍陛下潛邸時受馬七十九匹又盜用官庫物天厯
初領兵盧溝橋迎敵即逃擅閉城門驚惑民庶度支卿

納克楚嘗匿官馬又矯增制命臣等議其罪宜各杖一
百七除名斥還鄉里從之壬戌樞密院臣言雲南事已
平鎮西武靖王綽斯本言蒙古軍及哈喇章羅羅斯諸
種人叛者或誅或降雖已畧定其餘黨逃竄山谷豈無
反側請留荆王伊蘇額布根及諸王索諾木等

索諾木
與後卷

十五之索諾
木非一人

各領所部屯駐一二歲以示威重從之甲

子竒徹台獻名園命御史臺給鈔千錠酬其直御史臺
臣言同簽中政院事殷仲容姦貪邪佞冒哀居官詔黜

之戊辰詔以泥金輝和爾字書無量壽佛經千部五月
丙戌太禧宗禋院臣言累朝所建大萬安等十二寺舊
額僧三千一百五十人歲例給糧今其徒猥多請汰去
九百四十三人從之己丑置雲南等處宣慰司都元帥
府以土官昭練為宣慰使都元帥又置臨江元江等處
宣慰司兼管軍萬戶孟定路孟育路並為軍民總管府
者線蒙慶甸銀沙羅等甸並為軍民府孟併孟廣者樣
等甸並設軍民長官司庚寅立雲南省蘆傳路軍民總

管府以土官為之制授者各給金符癸巳雲南威楚路
之蒲蠻猛吾來朝貢願入銀為歲賦詔為置散府一及
土官三十三所皆賜金銀符甲午封宣政使托音為薊
國公以平江官田五百頃立稻田提舉司隸官相都總
管府乙未以陝西行臺御史大夫圖卜台知樞密院事
纂修皇朝經世大典成詔以泥金書佛經一藏丙申車
駕如上都敕在京百司日集公署自晨及暮毋廢事己
亥以額爾吉訥知行樞密院事辛丑改阿蘇萬戶府為

宣毅萬戶府賜銀印命已延領之癸卯加額爾吉訥太尉六月乙巳朔徵儲政院鈔三萬錠給中宮道路費乙卯監察御史陳良劾浙東廉訪使托克托濟延阿附權姦都爾蘇其生母何氏本父之妾而兄妻之欺誑朝廷封溫國夫人請黜罷憲職追還贈恩從之癸亥詔諸官吏在職役或守代未任為人行賕闕說即有所取者官如十二章論賊吏罷不叙終其身雖無所取訟起減由已者罪加常人一等甲子太府監頒宮嬪閹宦及宿衛

士行帳資裝免控鶴衛士當驛戶秋七月甲戌朔藝文少監歐陽玄言先聖五十四代孫襲封衍聖公爵最五等秩登三品而用四品銅印於爵秩不稱詔鑄從三品印給之己卯以雲南既平惟祿余等懼罪竄伏降詔曲赦之壬午監察御史張益等言竒徹台在英宗朝陰與中政使耀珠造謀誣告反覆不可信詔奪職禁銅廣東丁亥海南黎賊作亂詔江西湖廣兩省合兵捕之壬辰以知樞密院事圖卜台為御史大夫丁酉調甘州兵千

人薩里輝和爾兵五百人守贊布凌以防土番戊戌封

巴延為浚寧王賜金印仍前太保知樞密院事

按巴延傳封浚

寧王在八月與紀不符

辛丑懷德府洞蠻二十一洞田先什用等

以方物來貢還所擄生口八百餘人給其家癸卯知行

樞密院事徹爾特穆爾以兵討叛蠻鎖力哈迷失戮其

黨七百餘人八月甲辰朔日有食之封托琳和塔拉為

靖恭王寶喇卜多爾濟為懿德王

按元史諸王表靖恭懿德二王俱至順元

年封與紀異

辛亥帝還大都丙辰封內史沁達噶為豐國公

己未內侍實喇布哈坐巫蠱事杖流海南九月癸酉朔
詔皇子古魯達喇出居雅克特穆爾家乙亥築駐蹕臺
於大承天護聖寺東御史臺臣劾四川參政馬銘冒借
俸鈔娶妾且詬罵平章汪壽昌帝曰綱常之理尊卑之
分懵無所知其何以居上臨下亟罷之丙子海南賊王
周糾率十九洞黎蠻作亂命湖廣左丞伊喇薩納討捕
之丁亥御史臺臣言江西參政李允中乃故內侍李邦
寧養子器質庸下誤叨重選宜黜罷從之庚寅祿余寇

順元路丁酉雲南行省遣都事諾海鎮撫樂智等奉詔
往諭祿余及授以參政制命至撒家關祿余拒不受諾
海遇害冬十月癸丑如大承天護聖寺蒙古都元帥齊
喇引兵擊阿哈賊黨於靖江路海中山為雲梯登山破
其柵圖沁之弟必里克圖庫圖齊舉家赴海死又獲圖
沁第二人子三人誅之丁巳以江浙平江湖州等路水
傷稼減明年海運漕米遣官赴通鄒陵滄四州和雜粟
豆以足國用乙丑立昭功萬戶都總使府巴延特穆爾

布哈並兼昭功萬戶都總使丙寅命大都路定時估每月朔望送廣誼司以酬物價十一月壬申朔日有食之雲南行省言亦奚不薛之地所牧國馬歲給鹽以每月上寅日啖之則馬健無病比因布呼叛亂雲南鹽不可到馬多病死詔令四川行省以鹽給之乙亥李彥通蕭布呼齊等謀反伏誅丙子封諸王沃濟為保寧王

按元史諸

王表沃濟封保寧王在天歷二年與紀異

丁丑以興和路鷹坊及蒙古民戶

大雪畜牧凍死賑之己卯封覺特班為幽國公庚辰左

右欽察衛軍士千四百九十戶饑命上都留守司賑之
辛巳以戶部尚書耿煥為中書參知政事癸未詔養雅
克特穆爾之子塔喇海為子賜居第貲產詔每歲樞密
院宗正府遣官與遼陽行省官巡歷諸郡毋令諸王所
部擾民隆祥司使鴻和爾布哈言海南所建大興龍普
明寺工費浩穰黎人不勝其擾以故為亂詔湖廣行省
臣伊嚕布哈及宣慰宣撫二司領其役仍命廉訪司莅
之辛卯定諸鹽課鈔十二月戊申陝西行臺御史訥古

伯高坦等劾監察御史陳良持勢蔑法詔奪其敕命以黃金符鑄文曰翊忠徇義迪節同勲賜西域親軍副都指揮使竒徹旌其天厯初紅橋戰功壬子復命諸王呼喇珠還鎮雲南癸丑河南河北道廉訪副使僧嘉努言自古求忠臣必於孝子之門今官於朝者十年不省覲者有之非無思親之心實由朝廷無給假省親之制而有擅離官次之禁古律諸職官父母在三百里外三年聽一給定省假二十日父母歿者五年聽一給拜墓假

十日以此推之父母在三百里以至萬里外者宜計道坐遠近定立假期其應省覲匿而不省覲者坐以罪若詐冒假期規避以掩其罪與乍奔喪者同科詔中書省禮部刑部及翰林集賢奎章閣議之辛酉遣兵部尚書伊蘇布哈同簽通政院事哈努勒布哈迎帝師詔中書省御史臺遣官詣各道同廉訪司錄囚

三年春正月癸酉命高麗國王王燾仍為高麗國王賜金印己卯罷諸建造工役惟城郭河渠橋道倉庫勿禁

廣西羅韋里叛寇馬武冲等合龍州嶺北朗龍洞韋大
蟲攻陷那馬達那馬安等若命廣西宣慰司嚴軍禦之
壬午封孔子妻鄆國夫人亓官氏為大成至聖文宣王
夫人戊子萬安軍黎賊王奴羅等寇陵水縣戊戌諸王
章吉特獻俄羅斯百七十人酬以銀鈔庚子夔路忠信
寨洞主阿具什用合洞蠻寇施州二月癸卯諸王額森
特穆爾薨己酉祿余乞降於四川行省詔中書樞密御
史諸大臣雜議之辛酉以雅克特穆爾兼奎章閣大學

士領奎章閣學士院事己巳命雅克特穆爾集翰林集
賢太禧宗禋院議立太祖神御殿詔修曲阜宣聖廟叩
州舊井鹽水湧溢州民侯坤願自煮鹽而輸課於官詔
四川鹽運司主之三月庚午朔帝師至京師己丑復立
功德使司癸巳皇子古嚕達喇更名雅克特古斯置興
瑞司掌中宮歲作佛事乙未命雅克特穆爾依舊例以
鈔萬錠分給蒙古孤寡者己亥賜行樞密院鈔四萬錠
分給征烏撒烏蒙所調陝西四川蒙古軍及漸丁萬人

按元典章元制新附軍漢軍死亡者所有男兒官為養濟俟成丁充軍所謂漸丁蓋指此謹附考夏四

月戊午命奎章閣學士院以國字譯貞觀政要鐫板模印以賜百官乙丑安西王阿南達之子伊嚕特穆爾坐與輝和爾僧烏尼德巴迪爾班迪國師喇特納實哩沙津阿固齊謀不軌命宗王大臣雜鞠之獄成三人皆伏誅仍籍其家以喇特納實哩沙津阿國齊妻徹辰賜通政副使布琳玉鞍賜薩都餘人畜土田及七寶奩具金珠寶玉鈔幣並沒入大承天護聖寺命有司為巴延建

生祠立紀功碑於涿州仍別建祠立碑於汴梁五月癸酉賜雅克特穆爾宴於流盃池甲戌薩題請備錄自帝登極以來固讓大凡往復奏答其餘訓敕辭命及雅克特穆爾等宣力效忠之蹟命多喇續為蒙古托卜齊延一書置之奎章閣從之戊寅如大承天護聖寺己卯浙西道廉訪司劾副使三寶凶惡陰險紊亂紀綱詔罷之戊子遣使往帝師所居薩斯嘉之地以珠織制書宣諭其屬仍給鈔四千錠幣帛各五千匹分賜之庚寅帝如

上都置山東益都等處金銀銅鐵提舉司辛卯復以司徒印給萬安寺僧嚴吉祥詔給鈔五萬錠修帝師帕克斯巴影殿壬辰太常博士王瓚言各處請加封神廟濫及淫祠按禮經以勞定國以死勤事能禦大災能捍大患則祀之其非祀典之神自後不得加封從之六月己亥朔以伊嚕特穆爾等罪詔告中外大赦免四川行省今年差稅陝西行省今年商稅錄用托多王士熙托歡等已酉以御史中丞趙世安為中書左丞癸亥加授知

樞密院事額布勒開府儀同三司乙丑御史臺臣劾遼陽行省參政賽甫鼎庸鄙不勝任罷之監察御史陳思謙言內外官非文武全才出處繫天下安危能拯金革之難者勿許奪情起復從之禁諸卜筮陰陽人毋出入諸王公大臣家秋七月辛未以車坊官園賜巴延賜從征雲南將校鈔幣有差乙亥命僧於鐵幡竿修佛事施金百兩銀千兩幣帛各五百匹布二千匹鈔萬錠丁丑湖廣行省言黎賊勢猖獗乞益兵三千以備調用詔依

前詔促伊喇薩納尅日進兵壬午江西行省造螺鈿几榻遺雅克特穆爾詔賜匠者幣帛各一甲申雅克特穆爾獻俄羅斯二千五百人庚寅給鈔萬錠命雅克特穆爾分賜累朝宮分嬪御之貧乏者八月辛丑諸王阿爾雅實哩獻俄羅斯三十人漸丁百三人丙午遣官祭社稷

續宏簡錄云每歲上戊之典泰定朝無文至是乃一祭

丁未有事於太廟海道

漕運糧復至京師己酉帝崩於上都年二十九葬起輦

谷謚曰聖明元孝皇帝廟號文宗國語曰濟雅圖皇帝

後至元六年六月以帝謀為不軌使明宗飲恨而崩詔
除其廟主

文宗天歷二年

其元年即泰定帝致和元年
其二年即明宗即位之一年至順

三年凡五年

寧宗皇帝諱伊埒哲伯明宗子也母孛瑪錦氏明宗有
子二人長托歡特穆爾次即帝初封廊王至順三年八
月己酉文宗崩右丞相雅克特穆爾請立皇子雅克特
古斯皇后申文宗固讓初志欲傳位明宗子時托歡特

穆爾居靜江帝以文宗所眷愛獨留京師於是雅克特

穆爾請立帝

按順帝紀及雅克特穆爾傳皆云雅克特穆爾欲立文宗子雅克特古斯后不從而

止此元史紀文但云請立帝殊屬不合謹據增遣使徵諸王會京師中書百司

政務咸啓中宮取進止十月庚子帝即位大赦辛丑以

知樞密院事薩都為御史大夫中書右丞薩題為中書

平章政事宣政使竒爾濟蘇為中書右丞中書平章政

事圖勒噶特穆爾知樞密院事己酉敕諸王駙馬勲舊

大臣及中書省樞密院御史臺秩正二品百司庶府秩

至一品者闕門內施繩牀以坐餘皆禁之辛亥以江浙
歲比不登其海運糧不及數俟來歲補運丙辰給宿衛
士蒙古漢軍三萬人禦寒衣命江浙行省範銅造和寧
宣聖廟祭器凡百三十有五事庚申以巴延為徽政院
使依前開府儀同三司浚寧王太保錄軍國重事甲子
皇弟雅克特古斯受戒於西僧嘉勒幹巴勒丙寅楚邱
縣河堤壞發民丁二千三百五十人修之十一月壬申
命鄭王齊齊克圖鎮遼陽戊寅尊皇后曰皇太后御興

聖殿受朝賀壬辰帝崩年七歲葬起輦谷謚曰沖聖慈

孝皇帝廟號寧宗

王禕曰寧宗之立雖母后權臣利於立幼抑文宗顧命舍其子而立兄子

是不可謂非公天下之心也然終不足以掩弒兄之惡人心天理吁可畏哉謹按通鑑輯覽

御批謂文宗此舉實欲掩其弒兄之罪且以矯仁宗不傳位武宗二子之非耳孰知廊王既不永年而順帝并至覆其宗社付託不慎貽害若斯明臣王禕乃謂其有公天下之心不亦謬乎恭錄識之

寧宗一年

即文宗至順三年

欽定續通志卷六十八

欽定四庫全書

欽定續通志卷六十九

元紀 十三

順帝 一

順帝名托歡特穆爾明宗長子母哈喇魯特氏郡王阿爾斯蘭之裔孫也初太祖取西北諸國阿爾斯蘭率其衆來降乃封為郡王俾領其部族及明宗北狩過其地納哈喇魯特氏而生帝文宗至順元年明宗后班布爾

實被讒遇害遂徙帝于高麗使居大青島中不與人接

閱一載復詔天下言明宗在朔漠之時素謂非其己子

乃移於廣西之靜江

按庚申外史謂帝為瀛國公子蓋由文宗欲廢帝而立己子故因帝

乳母夫吉播告中外好事者遂轉相附會耳又宋紀事本末文宗至順元年五月黜帝居江南召翰林學士額琳特穆爾書其事于托卜齊延又命虞集書詔告天下與紀所載互異三年文宗崩寧宗

立已而寧宗又崩雅克特穆爾請立文宗子雅克特古

斯文宗后不從曰吾子尚幼托歡特穆爾在廣西年十

三矣且明宗長子禮當立之乃命中書右丞奇爾濟蘇

迎帝於靜江至良鄉具鹵簿迓之雅克特穆爾既見帝並馬徐行且陳迎立意帝幼且畏之一無所答雅克特穆爾疑之故帝至京久不得立適太史亦言帝不可立立則天下亂以故議未決遷延者數月國事皆決于雅克特穆爾奏文宗后而行之癸酉春三月雅克特穆爾死后乃與大臣定議立帝且與帝約曰萬歲後其傳位於雅克特古斯若武宗仁宗故事于是諸王宗戚奉上璽綬勸進夏六月己巳帝即位於上都大赦時有阿勒

呼木特穆爾者明宗親臣也言于帝曰天下事重宜委宰相決之庶可責其成功若躬自聽斷則必負惡名帝信之由是深居宮中每事無所專焉辛未以巴延為太師中書右丞相上柱國監修國史兼奎章閣大學士領學士院太史院回回漢人司天監事薩敦為太傅左丞相秋八月立雅克特穆爾女巴約特氏為皇后按雅克特穆爾傳立后在至元元年三月紀事本末在是年九月皆與紀異九月甲寅中書省臣言官員遞升窒礙選法今請自省院臺官外其餘不許遞

升從之庚申詔太師右丞相巴延太傅左丞相薩敦專
理國家大事餘官不得兼領三職詔免儒人役冬十月
戊辰詔改是年為元統元年丁丑依皇太后行年之數
釋放罪囚二十七人戊子封薩敦為榮王騰吉斯襲父
封為太平王進階金紫光祿大夫十一月辛卯朔罷富
州金課丙申鞏昌成紀縣地裂山崩令有司賑被災人
民辛丑起梭毛殿辛亥江西湖廣江浙河南復立榷茶
運司封巴延為秦王錫金印

按巴延傳進封秦王在元
統二年十一月與紀異

乙卯以雅克特穆爾平江舊賜田五百頃復賜其子騰
吉斯罷河間大報恩寺諸色人匠總管府十二月乙丑
廣西徭寇湖南隘道州千戶郭震戰死壬申遣省臺官
分理天下囚

元統二年春正月辛卯以御史大夫圖卜台為中書平

章政事

按元史宰相表圖卜台為平
章政事在元統元年與紀異

阿爾哈雅為河南

行省左丞相甲寅罷廣教總管府二月己未朔詔內外
興舉學校癸亥廣西徭寇邊殺官吏詔廣海官已除而

未上者罪之乙丑以雅克布琳為太保置僚屬戊辰封額布勒額布根為昌寧王甲申太廟木陛壞遣官告祭三月己丑朔詔科舉取士國子學積分饒學錢糧儒人免役悉依累朝舊制學校官選有德行學問之人以充辛卯以陰陽家言罷造作四年癸巳廣西猺寇復起殺同知元帥竒爾薩遣右丞圖魯默色將兵討之乙巳益都真定盜起詔選省院官往督捕之仍募能擒獲者倍其賞丁未以河南行省左丞相阿爾哈雅為江浙行省

左丞相壬子廣西慶遠府徭寇全州詔平章政事特默齊統兵擊之丁巳詔蒙古色目犯姦盜詐偽之罪者隸宗正府漢人南人犯者屬有司夏四月戊午朔日有食之庚申封宗室曼濟為文濟王壬申以騰吉斯為總管高麗女真漢軍萬戶府達嚕噶齊與滿濟勒噶台並為御史大夫己卯加榮王左丞相薩敦開府儀同三司上柱國錄軍國重事癸未立鹽局于宗師南北城官自賣鹽以革專利之弊乙酉中書省臣言佛事布施費用太

廣以世祖時較之歲增金三十八錠銀二百三錠四十兩繒帛六萬一千六百餘匹鈔二萬九千二百五十餘錠請除累朝期年忌日之外餘皆罷從之是月帝如上都五月己丑宦者博囉特穆爾傳皇后旨取鹽一十萬引入中政院辛卯以驍吉斯代薩敦為中書左丞相薩敦仍商量中書省事壬辰以中書平章政事薩題領蒙古國子監戊申以文濟王曼濟鎮大名雲南王阿魯鎮雲南是月以江浙大饑發常平義倉賑之并存海運糧

七十八萬三百七十石以備不虞詔王侯宗戚軍站人
匠鷹坊控鶴但隸京師諸縣者所在一體役之六月乙
亥騰吉斯辭左丞相不拜復命薩敦為左丞相辛巳詔
蒙古色目人行父母喪秋七月壬辰帝如大安閣壬寅
詔蒙古色目人犯盜者免刺丙午帝如楠木亭八月戊
午祭社稷自是復舉
上戊之典辛未大赦九月辛卯帝還大都甲
午猺賊陷賀州癸河南江浙江西湖廣諸軍及八番義
從軍命廣西宣慰使都元帥章巴延擊之冬十月乙卯

朔正內外官朝會儀班次一依品從辛酉以侍御史許
有壬為中書參知政事癸未命臺憲部官各舉材堪守
令者一人十一月戊子中書省臣請發兩艘船下番為
皇后營利十二月甲戌詔整治學校

至元元年春正月癸巳申命廉訪司察郡縣勸農官勤
惰達大司農司以憑黜陟二月甲寅朔革冗官乙卯車
駕將田於柳林以御史臺臣諫而止三月癸未朔遣五
府官決天下囚御史臺臣言丞相已領軍國重事省院

臺官俱不得兼領各衛從之平伐都雲定雲酋長寶郎
天都蟲等來降即其地復立宣撫司參用其土酋為官
庚子御史臺臣言高麗為國首效臣節而近年屢遣使
往選取媵妾至使生女不舉女長不嫁乞賜禁止從之
乙巳以中書左丞旺結參知政事許有壬知經筵事封
安南世子陳端午為安南國王夏四月癸丑朔詔諸官
非節制軍馬者不得佩金虎符辛酉以江南行御史臺
中丞布哈為中書省參知政事己巳加騰吉斯開府儀

同三司已外詔翰林國史院纂修累朝實錄及后妃功
臣列傳庚辰罷功德典瑞營繕集慶翊正羣玉繕工金
玉珠翠諸提舉司以薩題為御史大夫禁犯御名五月
戊子帝如上都遣使者詣曲阜孔子廟致祭壬辰命
嚴謚法以絕冒濫甲辰巴延請以右丞相讓騰吉斯詔
不允以騰吉斯為左丞相按已延傳是時薩
敦已卒紀畧之六月庚辰
騰吉斯作亂及其弟塔喇海皆伏誅諸王鴻和特穆爾
自殺執皇后巴約特氏幽于別所秋七月辛巳朔以滿

濟勒噶台阿恰齊並為御史大夫壬午巴延弒皇后巴約特氏于開平民舍壬辰加滿濟勒噶台銀青榮祿大夫開府儀同三司領承徽寺壬寅專命巴延為中書右丞相罷左丞相不置乙巳罷雅克特穆爾騰吉斯舉用之人戊申誅達哩及阿恰齊等于市詔曰曩者文宗皇帝以雅克特穆爾嘗有勞伐父子兄弟顯列朝廷而輒造事釁出朕遠方文皇尋悟其妄有旨傳次于予雅克特穆爾貪利幼弱復立朕弟伊埒哲伯不幸崩殂今丞

相巴延追奉遺詔迎朕于南既至大都雅克特穆爾猶
懷兩端遷延數月天隕厥躬巴延等同辭翊戴乃正宸
極後薩敦達哩騰吉斯相襲用事交通宗王鴻和特穆
爾圖危社稷阿恰齊亦嘗與謀賴巴延等以次掩捕明
正其罪元凶構難貽我皇太后震驚朕用兢惕永惟皇
太后後其所生之子一以至公為心親挈大寶畀予兄
弟迹其定策兩朝功德隆盛近古罕比雖嘗奉上尊號
揆之朕心猶為未盡已命大臣特議加禮巴延為武宗

捍禦北邊翼戴文皇茲又克清大憝明飭國憲爰賜達
爾罕之號至于子孫世世永賴可赦天下八月癸亥詔
以岐陽王諤勒哲特穆爾知樞密院事特穆爾布哈並
為御史大夫甲子加諤勒哲特穆爾太傅己卯議尊皇
太后為太皇太后許有壬諫以為非禮不從九月庚辰
朔車駕駐扼虎嶺丙戌赦丁亥封知樞密院事奇爾濟
蘇為宜國公太保中書平章政事昂珠為宣德王庚子御
史臺臣言國朝初用宦官不過數人內府執事不下千餘乞依

舊制裁減冗濫廣仁愛之心省糜費之患從之丙午詔以烏撒烏蒙之地隸四川行省是月帝還大都冬十月丙辰以大司農塔斯哈雅為太尉置僚屬商議中書省事丁己以達實特穆爾為太禧院使議軍國重事流鴻和特穆爾達哩騰吉斯子孫於邊地癸亥流御史大夫諤勤哲特穆爾於廣海安置選省院臺宗正府通練刑獄之官分行各道與廉訪司審決天下囚戊辰監察御史呂思誠等十九人劾奏徹爾特穆爾之罪不聽皆辭去惟陳允文以不署名留十月庚辰敕以

所在儒學貢士莊田租給宿衛衣糧詔罷科舉乙酉巴延請
內外官悉循資銓注今後無得保舉澀滯選法從之丁酉以
戶部尚書徐奭吏部尚書鼎珠參議中書省事戊戌召前知
樞密院事布敦實喇布哈寶喇德格還京師辛丑詔改元統

三年仍為至元元年

按年號襲舊于古未聞襲其名而不蹈
共實更為無益伏讀通鑑輯覽

御批謂法祖貴乎遵循成憲豈在
沿用舊名洵為至論謹錄識之

十二月丁巳詔巴延領官相

府壬戌命四川雲南行省保選蠻夷官以俟銓法乙丑奉玉
冊玉寶上太皇太后尊號曰贊天開聖徽懿昭宣貞文慈佑

儲善衍慶福元太皇太后丁丑西番賊起遣兵擊之戊寅
蒙古國子監成閏月乙酉詔四川鹽運司仍於官井造鹽
餘井聽民煮造收其課十之三壬辰詔宗室托克托穆爾
襲封荆王賜金印命掌莽賚諸軍設立王府官屬戊戌御
史臺臣復劾奏中書平章政事徹爾特穆爾罪罷之壬寅
流徹爾特穆爾於南安是歲賜天下田租之半

二年春正月置都水庸田使司於平江二月丁酉遣尊帝
生母瑪里達為貞裕徽聖皇后庚子進封宣靖王邁努為

益王三月甲戌復四川鹽井之禁以旺嘉努為宣政院使
加金紫光祿大夫夏四月丁丑朔禁民間私造格例戊寅
封駙馬博囉特穆爾為毓德王丁亥禁服麒麟鸞鳳白兔
靈芝雙角五爪龍八龍九龍萬壽福壽字楮黃等服庚寅
以知樞密院事特穆爾布哈為中書平章政事薩題為御
史大夫戊戌帝如上都以中書左丞耿煥為侍御史王德
懋為中書左丞五月丙午朔黃河復於故道六月庚辰命
中書平章政事昂吉爾知經筵事戊子以特穆爾布哈為江

浙行省左丞相辛卯禮部侍郎呼喇台請復科舉取士之制不聽秋七月庚戌以鼎珠索諾木參議中書省事庚申禁隔越中書口傳敕旨冒支錢糧癸酉命宗王布埒齊駙馬伊嚕布哈特古斯嘉琿鎮蘇魯克吉魯爾之地八月甲戌朔日有食之壬辰立屯衛於滿濟勒噶之地庚子詔強盜皆死盜牛馬者劓盜驢騾者黥額再犯劓盜羊豕者墨項再犯黥三犯劓劓後再犯者死盜諸物者照其數估價省院臺五官府三年一次審決著為令九月癸亥弛鞞昌

總帥府漢人軍器之禁戊辰帝還大都冬十月己亥詔每
日右丞相巴延太保鼎珠中書平章政事博囉昂吉爾聚
議于內廷平章政事塔斯哈雅右丞袞布巴勒參知政事
納琳許有壬等聚議于中書十一月壬子以諾海為湖廣
行省平章政事討廣西叛獠丁巳遣河南行省平章政事
伊嚕布哈于西番為僧癸亥安置宗王布埒齊于梧州辛
未禁彈弓努箭袖箭是歲以雅克特穆爾居第賜灌頂國
師納木喀僧格號大覺海寺塑千佛於其內

三年春正月癸卯廣州增城縣民朱光卿反其黨石昆
山鍾大明率衆從之偽稱大金國改元赤符命指揮噶
扎爾江西行省左丞實迪討之戊午帝獵于柳林凡三
十五日監察御史起台宋紹明進諫帝嘉納之賜金幣
起台等固辭帝曰昔魏徵進諫唐太宗未嘗不賞汝其
受之二月壬申朔日有食之樺胡反於汝寧信陽州破
歸德府鹿邑焚陳州屯營于杏岡命河南行省左丞慶
通討之丙子立船戶提舉及提領司定船戶科差甲申

定服色器皿輿馬之制辛卯賑江浙等處饑民開所在
山場河泊之禁廣西徭賊復反命湖廣行省平章諾海
江西行省平章圖嚕默色哈雅討之庚子中書參知政
事納琳等請立採珠提舉司先是嘗立提舉司泰定間
以其煩擾罷去至是納琳請復立之且以採珠戶四萬
賜巴延三月戊午立鴻吉哩氏巴延呼圖克為皇后乙
丑以宗王雅克特穆爾為大宗正府扎爾固齊夏四月
癸酉禁漢人南人高麗人不得執持軍器凡有馬者拘

入官已卯帝如上都壬午高麗王喇特納實哩朝賀還

國

此與前文喇特納實哩非一人

並其從官賜與有差辛卯合州大足

縣民韓法師反自稱南朝趙王己亥惠州歸善縣民聶

秀卿譚景山等與朱光卿相結為亂命江西行省左丞

實迪捕之是月詔省院臺部宣慰司廉訪司及部府幕

官之長並用蒙古色目人禁漢人南人不得習學蒙古

色目文字五月辛丑民間訛言朝廷拘刷童男童女一

時嫁娶殆盡戊申詔汝寧棒胡廣東朱光卿聶秀卿等

皆係漢人凡漢人官于省臺院及翰林集賢者可講求
誅捕之法以聞甲寅詔哈瑪爾圖及圖沁特穆爾為太
尉各設僚屬幕官四番賊起殺鎮西王子丹巴立行宣
政院以額森特穆爾為院使往討之壬戌命四川行省
參知政事吉里等捕反賊韓法師秋七月癸卯車駕出
獵丁未如龍岡灑馬乳以祭庚申詔除人命重事之外
凡盜賊諸罪不須候五府官審錄有司依例決之是月
朱光卿就擒八月辛巳京畿盜起癸未弛高麗執持軍

器之禁仍令乘馬戊子漢人鎮邊生番處並開軍器禁
是月帝還大都九月己酉立四川湖廣江西江浙行樞
密院冬十月乙亥命江浙行省丞相吹斯戡提調海運
十一月丙午立屯田于雄州癸亥賑宣德等處地震死
傷人戶十二月以滿濟勒噶台為太保分樞密院鎮北
邊已延請殺張王劉李趙五姓漢人帝不從徵西域僧
桑結喇嘛至京師號灌頂國師賜玉印

四年春正月丙申以地震赦天下詔內外廉能官父母

年七十無侍丁者附近銓注以便侍養是月詔修曲阜孔子廟二月丁卯罷河南江西江浙湖廣四川等處行樞密院庚午車駕獵于柳林三月辛酉命中書平章政事昂吉爾監修至正條格夏四月辛未以特默齊濟爾噶岱為中書平章政事癸酉以托克托為御史大夫乙亥命昂吉爾為奎章閣大學士兼知經筵事己卯帝如上都河南執棒胡至京師誅之五月辛酉詔土番宣慰司軍士許乘馬執兵器湖廣行省原領新化洞古州潭

溪龍里洪州諸洞三百餘處洞民六萬餘戶分隸靖州
是月命佛嘉律為考功郎中喬林為員外郎魏宗道為
主事考較天下郡縣官屬功過命河勒錦復為中書平
章政事六月辛巳袁州民周子旺反尋伏誅是月漳州
路南勝縣民李志甫反圍漳州守將吹斯戩與戰不利
詔江浙行省平章拜布哈發浙閩江西廣東軍討之秋
七月壬寅詔以巴延有功立生祠於涿州汴梁八月癸
亥朔日有食之甲申雲南老告土官八那遣姪那賽齋

馬來朝為立老告軍民總管府是月帝還大都十一月
丁卯立紹熙府軍民宣撫都總使司十二月戊戌立邦
牙等處宣慰司都元帥府及總管府壬寅以宣徽使伯
勒奇爾布哈為御史大夫

五年春正月癸亥禁濫予僧人名爵二月庚子免廣海
添辦鹽課萬五千引夏四月帝如上都秋七月戊寅詔
諸王位下官母入常選八月丁亥帝還大都九月丁巳
以瀋陽饑賑之冬十月壬辰禁倡優盛服許男子裹青

巾婦女服紫衣不許戴笠乘馬甲午以巴延為大丞相
加元德上輔功臣之號賜七寶玉書龍虎金符十一月
戊辰開封杞縣人范孟反詐稱詔使殺河南行省平章
政事伊魯特穆爾左丞齊喇廉訪使諤勒哲布哈等尋
伏誅十二月辛卯復立都水庸田使司于平江先是嘗
置而罷至是復立是歲敕賜曲阜宣聖廟碑

六年春正月甲戌立司禮監

按元史百官志至元年十二月依世祖故事復立

司禮監
興紀異

奉太祖太宗睿宗三朝御容于石佛寺二月己

亥黜中書大丞相巴延為河南行省左丞相詔曰朕踐位以來命巴延為太師秦王中書大丞相而巴延專權自恣欺朕年幼輕視太皇太后及朕弟雅克特古斯變亂祖宗成憲虐害天下加以極刑允合輿論朕念先朝之故尚存憫恤今出為河南行省左丞相所有原領諸衛親軍并集賽台人等詔書到時即許散還以太保滿濟勒噶台為太師中書右丞相太尉塔斯哈雅為太傅知樞密院事塔瑪齊為太保御史大夫托克托為知樞

密院事旺嘉努為中書平章政事嶺北行省平章政事
額森特穆爾為御史大夫壬寅詔除知樞密院事托克
托之外諸王侯不得懸帶弓箭環刀輒入內府乙巳罷
各處船戶提舉廣東採珠提舉二司丁未罷通州河西
務等處抽分按利房大都東裏山查提領所三月甲寅
漳州民陳君用襲殺反賊李志甫授君用同知漳州路
總管府事癸亥以知樞密院事托克托御史大夫伯勒
奇爾布哈知樞密院事雅克布哈知經筵事中書參議

阿蘭法珠兼經筵官辛未詔徙已延於南恩州陽春縣
安置未至死于道丁丑以治書侍御史達實特穆爾為
奎章閣大學士翰林直學士濟密斯為奎章閣供奉學
士夏四月庚寅以同知樞密院事特穆爾達實為中書
右丞丙午封滿濟勒噶台為忠王加達爾罕之號滿濟
勒噶台辭五月癸丑禁民間藏軍器己未漳州龍巖尉
黃佐才獲李志甫餘黨鄭子箕佐才因與賊戰妻子四
十餘口皆遇害以佐才為龍巖縣尹丙子帝如上都六

月丙申撤文宗廟主徙太皇太后布達實哩東安州安置放太子雅克特古斯於高麗詔曰昔我皇祖武宗昇遐之後祖母太皇太后惑于憊慝俾皇考出封雲南及英宗遇害泰定告終我皇考遠居朔漠宗王大臣同心翊戴于時以地近先迎文宗暫總機務繼知天理人倫所在假讓位之名以寶璽來上皇考推誠不疑即授以皇太子寶文宗當躬迓之際乃與其臣伊魯布哈阿哩雅明埒棟阿等謀為不軌使我皇考飲恨上賓歸而再

御宸極海內聞之靡不切齒又私圖傳子乃構邪言嫁禍于班布爾實皇后謂朕非明宗之子遂俾出居遐陬祖宗大業幾於不繼內懷愧慊則殺阿哩雅以杜口上天不祐隨降殞罰叔孀布達實哩怙其勢皎舍冢嗣而立孺稚奄復不年諸王大臣以賢以長扶朕踐位每念治必本于盡孝事莫先于正名賴天之靈權姦屏黜永惟鞠育罔極之恩忍忘不共戴天之義其命太常撤去圖卜特穆爾在廟之主布達實哩削去太皇太后之號

徙東安州安置雅克特古斯放諸高麗當時賊臣伊嚕
布哈阿哩雅已死其以明埒克棟阿等明正典刑監察
御史崔敬言雅克特古斯不宜放逐不報太皇太后尋
暴崩雅克特古斯亦中道遇害秋七月戊午以星變地
震及旱蝗下詔罪己己未以琳沁巴勒為御史大夫八
月壬午以額森特穆爾為御史大夫是月帝還大都九
月丙寅詔今後有罪者毋籍其妻女以配人冬十月辛
卯詔各愛滿人不許與常選壬寅滿濟勒噶台辭右丞

相職仍為太師以托克托為中書右丞相宗正扎爾固齊特穆爾布哈為中書左丞相十二月復科舉取士制

戊子罷天厯以後增設太禧宗禋等院及奎章閣

按續通鑑

綱目初文宗設太禧宗禋等院及奎章閣藝文監至是大臣議悉革罷庫庫曰民有千金之產尚設家塾以延館客堂堂天朝一學房乃不能容耶帝然之改奎章閣為宣文閣藝文監為崇文監考百官志崇文之改即在是年十二月宣文之改則在至正元年九月紀于此未書改藝文監為崇文監而改宣文閣又書于明年六月皆與志互異

至正元年春正月己酉朔改元癸亥詔天壽節

禁屠宰六日是月以托克托領經筵事命永明寺寫金

字經一藏三月庚戌罷兩淮屯田手號打捕軍役令屬
本所領之癸丑命屯儲禦軍于河南芍陂洪澤德安三
處屯種甲寅給還特穆爾布哈宣讓王印鎮淮西夏四
月丁丑道州土賊蔣丙等反破江華縣掠明遠縣庚寅
以中書右丞特穆爾達實為平章政事阿魯為右丞許
有壬為左丞是月帝如上都五月戊申以崇文監屬翰
林國史院己未罷河西務行用庫閏月甲午賞賜扈從
明宗諸王官屬八百七人金銀鈔幣各有差六月戊午

禁高麗及諸處民以親子為宦者因避賦役戊辰改舊
奎章閣為宣文閣秋七月帝還大都冬十月己酉封阿
實克布哈為順寧王實保齊哈沙順國公甲寅中書省
臣奏海運不給宜令江浙行省於中政院財賦府撥賜
諸人寺觀田糧總運二百六十萬石從之十一月丙子
道州路賊何仁甫等反庚子搖賊寇邊湖廣行省平章
政事袞布巴勒討平之十二月乙卯詔民年八十以上
蒙古人賜繒帛二表裏其餘州縣旌以高年耆德之名

免其家雜役壬戌雲南車里寒賽刀等反雲南行省平章政事托克托穆爾討平之

二年春正月丙戌開京師金口河二月壬寅頒農桑輯要乙卯李實迪偽造御寶聖旨稱樞密院都事伏誅夏四月己酉罷雲南蒙慶宣慰司是月帝如上都五月丁亥以江浙行省平章政事濟爾噶岱為河南行省平章政事六月戊申命江浙撥賜僧道田還官徵糧以備軍儲乙丑罷邦牙宣慰司秋七月己亥慶遠路莫八聚衆

反攻陷南丹左右兩江等處托克托濟延討平之八月
庚子朔日有食之九月己巳詔遣湖廣行省平章政事
袞布巴勒領河南江浙湖廣諸軍討道州賊平之復平
嶼峒堡寨二百餘處辛未帝還大都丁丑京城強賊四
起冬十月己亥朔日有食之壬戌遣官致祭孔子於曲
阜甲子杭州嘉興紹興温州台州等路各立檢校批驗
鹽引所權免兩浙額鹽十萬引福建餘鹽三萬引十一
月甲申詔免雲南明年差稅十二月丙午命中書右丞

太平樞密副使姚庸御史中丞張起巖知經筵事辛亥
封鴻和特穆爾之子徹爾特穆爾為撫寧王丙辰賜雲
南行省參知政事布拉三珠虎符以兵討捕叛蠻癸亥
阿魯圖們等以謀害宰臣圖為叛逆伏誅

三年春二月丁未遼陽沃濟野人叛三月壬申造盃頂
殿以終場下第舉人充學正山長國學生會試不中者
與終場舉人同戊寅詔作新風憲在內官不法者監察
御史劾之在外官不法者行臺監察劾之歲以八月終

出巡次年四月終還司是月詔修遼金宋三史以中書
右丞相托克托為都總裁官中書平章政事特穆爾達
實中書右丞太平御史中丞張起巖翰林學士歐陽玄
侍御史呂思誠翰林侍講學士濟宻斯為總裁官夏四
月丙申朔日有食之是月帝如上都六月壬子命經筵
官月進講者三是月回回拉里五百餘人渡河寇掠解
吉隰等州中書戶部以國用不足請撙節浮費秋七月
戊辰修大都城戊寅立永昌等處宣慰司八月甲午朔

命圖沙瑪同知宣慰司事縑勒噶等討四川上蓬瑣吃
賊戊戌山東有賊焚掠兗州是月帝還大都九月甲子
湖廣行省平章政事袞布巴勒擒道州賀州徭賊首唐
大二蔣仁五至京誅之其黨將丙自號順天王攻破連
桂二州冬十月己酉帝親祀上帝于南郊以太祖配癸
丑以簽樞密院事韓元善為中書參知政事中書參議
敏珠爾丹同知宣徽院事己未以郊祀禮成大赦文官
普減一資武官升散官一等蠲民間田租五分賜高年

帛以湖廣行省平章政事衮布巴勒為宣徽院使行樞密院知院拉拉為翰林學士承旨十二月丙申詔寫金字藏經丁未以伯勒齊爾布哈為中書左丞相是歲詔立常平倉罷民間食鹽徵遺逸托音巴延張瑾杜本本辭不至

四年春正月辛巳定守令黜陟之法庚寅河決曹州雇夫萬五千八百修築之二月以中書右丞太平為平章

政事

按續通鑑以賀惟一為平章政事復拜御史大夫
政事臺省正官非國姓不以授惟一固辭詔特賜

姓改其名
曰太平
閏月辛酉朔永平澧州等路飢賑之三月壬

寅特授巴特瑪多爾濟征東行省左丞相嗣高麗國王
癸丑以河南行省平章政事納琳為中書平章政事集
賢大學士姚庸為中書左丞夏四月帝如上都五月乙
未右丞相托克托辭職不許甲辰許之以阿魯圖為中
書右丞相乙巳封托克托為鄭王六月戊辰鞏昌灑西
縣飢每戶貸常平倉粟三斗俟年豐還官己巳賜托克
托松江田為立松江等處稻田提領所秋七月戊子朔

益都瀕海鹽徒郭和爾齊作亂八月郭和爾齊上太行
由陵川入壺關至廣平殺兵馬指揮復還益都是月帝
還大都九月丁亥朔日有食之辛亥以南臺治書侍御
史秦從德為江浙行省參知政事提調海運癸丑命御
史大夫額森特穆爾平章政事特穆爾達實知經筵事
右丞達實特穆爾提調宣文閣知經筵事按元史宰相表是年九月
以達實特穆爾為右丞董守簡為左丞本紀俱未載冬十月乙酉議修黃河淮河
堤堰十一月丁亥朔以各郡縣民飢不許抑配食鹽復

令民入粟補官以備賑濟戊子禁內外官民宴會不得
用珠花十二月己未四川廉訪司建言廣元等五路廣
安等三府永寧等兩宣撫司請依內郡設置推官一員
從之戊寅徭賊寇靖州是歲徭賊寇潯州同知府事保
通率民兵擊走之

五年春三月以陳思謙參議中書省事夏四月丁卯敕
大都流民官給路糧遣其還鄉是月募富戶出米五十
石以上者旌以義士號帝如上都五月己丑詔以軍士

所掠雲南子女一千一百人放還鄉里仍給其行糧不願歸者聽丁未河間轉運司竈戶被水災詔權免餘鹽二萬引候年豐還官秋七月丙午以額森特穆爾特穆爾達實並為御史大夫八月帝還大都九月壬午日有食之辛丑以中書右丞達實特穆爾為翰林學士承旨中書參知政事吹斯戩為右丞資政院使多爾濟巴勒為中書參知政事冬十月壬子以中書平章政事太平為御史大夫辛酉命奉使宣撫巡行天下辛未遼金宋

三史成右丞相阿魯圖進之帝曰史既成書前人善惡朕當取為法戒然豈止激勸為君為臣者亦當知之卿等其體朕心以前代善惡為勉已勿監察御史布達實哩請罷造作不急之務是月以呂思誠為中書參知政

事

按元史宰相表是時改參知政事韓元善為司農大卿故以呂思誠代之紀未詳載

十一月甲

午至正條格成奉元路陳望叔偽稱雅克特古斯太子伏誅十二月丁巳詔定薦舉守令法是歲宣徽院使都稜特穆爾知樞密院事馮思溫為御史中丞

六年春二月庚戌朔日有食之三月辛未盜扼李開務之閘河劫商船戊申京畿盜起范陽縣請增設縣尉及巡警兵從之山東盜起詔中書參知政事索諾木巴勒至東平鎮遏夏四月壬子遼陽為捕海東青煩擾沃濟野人及碩達勒達皆叛甲寅以中書參知政事呂思誠為左丞丁卯帝如上都萬戶邁珠等討沃濟野人遇害詔恤其家以中書左丞呂思誠知經筵事命左右二司六部吏屬于午後講習經史五月壬午象州盜起丁亥

盜竊太廟神主丁酉以黃河決立河南山東都水監六月己酉汀州連城縣民羅天麟陳積萬叛陷長汀縣福建元帥府經歷真實萬戶廉和尚等討之丁巳雲南賊思可伐作亂侵奪路甸命額圖瑛為雲南平章討之秋七月丁亥散毛洞蠻覃全在叛招降之以為散毛誓厓等處軍民宣撫使癸巳詔選集賽官為路府縣達嚕噶齊丙申以多爾濟巴勒為中書右丞達爾瑪為參知政事壬寅以御史大夫琳沁巴勒等知經筵事甲辰京畿

奉使宣撫昂昂舉奏御史實巴爾等罪杖黜之八月丙午命江浙行省右丞呼圖克布哈江西行省右丞圖魯統軍合討羅天麟是月帝還大都九月乙酉復長汀冬閏十月乙亥大赦免差稅三分水旱之地全免靖州猺賊吳天保陷黔陽癸未汀州賊徒羅德用殺首賊羅天麟陳積萬以首級送官餘黨悉平十二月甲申復立大護國仁王寺大昭應宮財用規運總管府凡貸民間錢二十六萬餘錠辛卯有司以賞賚汎濫奏請恩賜必先

經省臺院定擬甲午設立哈哈拉塔屯田二處復立八百宣慰司以土官韓部襲其父爵辛丑以濟蘭巴爾為太尉開府置僚屬壬寅山東河南盜起遣左右阿蘇衛指揮布爾噶等討之尚書李綱請躬祀郊廟近正人遠邪佞以崇陽抑陰不聽

七年春正月甲辰朔日有食之大寒而風朝官仆者數人壬子以中書左丞相伯勒齊爾布哈為右丞相尋辭免丁巳復立東路都蒙古軍都元帥府庚申雲南老了

等蠻來降立老丁耿東路軍民總管府二月庚辰以中書參知政事索諾木巴勒為中書右丞道通為中書參

知政事

按元史宰相表道通為參政在是年三月與紀異

丙戌以宦者拜特穆

爾為司徒是月徭賊吳天保寇沅州以昂吉爾為知樞密院事整治軍務三月甲辰中書省臣言世祖之朝省臺院奏事給事中專掌之以授國史纂修近年廢弛恐萬世之後一代成功無從稽考乞復舊制從之乙巳遣使銓選雲南官員修光天殿戊午詔編六條政類夏四

月辛己以通政院使都蘭格爾為遼陽行省參知政事
討沃濟野人已丑以翰林學士承旨昂珠為中書右丞
庚寅復命伯勒齊爾布哈為中書右丞相以特穆爾達
實為左丞相通州盜起監察御史言通州密邇京城而
盜賊蜂起宜增兵討之以杜其源不聽是月河東大旱
民多飢死遣使賑之帝如上都五月庚戌吳天保陷武
岡路遣湖廣行省右丞實保統軍討之己丑右丞相伯
勒齊爾布哈以災異迭見罷詔以太保就第六月免太

師滿濟勒噶台官安置西寧州其子托克托請與父俱
行以御史大夫太平為中書平章政事秋七月甲寅召
隱士諤勒哲圖濟爾噶朗為翰林待制張樞董立為翰
林修撰李孝先為著作郎張樞不至丁巳以江南行臺
大夫納琳為御史大夫是月吳天保復寇沅州陷叙浦
辰溪縣九月癸卯巴哩納哈喇諾海塔爾哈巴賊起斷
嶺北驛道戊申帝還大都甲寅詔舉才能學業之人以
備侍衛丁巳中書左丞相特穆爾達實薨辛酉以御史

大夫多爾濟為中書左丞相甲子集慶路盜起鎮南王
博羅布哈討平之丁卯吳天保復陷武岡延及寶慶殺
湖廣行省右丞實保于軍中冬十月丁丑詔左右丞相
平章樞密知院御史大夫得賜玉押字印餘官不與丙
戌琳沁達喇反遣兵討之辛卯開東華射圃戊戌西番
盜起凡二百餘所陷哈喇和卓劫供御葡萄酒殺使臣是
月吳天保復寇沅州州兵擊走之十一月甲辰沿江盜
起兩淮運使宋文瓚上言江陰通泰江海之門戶而鎮

江真州次之國初設萬戶府以鎮其地今戍將非人致使賊艦往來無常集慶花山劫賊才三十六人官軍萬數不能進討反為所敗後竟假手鹽徒雖能成功豈不

貽笑

按輟耕錄載是時花山賊單四等三十六人內一婦一僧尤勇健官軍討之三月不能擒後募鹽徒

朱陳等率其黨擒之文璠所言假手鹽徒蓋指此

宜亟選智勇以任兵權柄以

圖後功不然東南五省租稅之地恐非國家之有不聽撥山東地土十六萬二千餘頃屬大承天護聖寺庚戌吳天保復陷武岡命湖廣行省平章政事果勒領兵討

之以河決命工部尚書穆爾瑪哈穆特行視金堤甲寅
吳天保陷靖州命威順王庫春布哈鎮南王博囉布哈
及湖廣江西二省以兵討之己未以韓嘉訥為中書平

章政事

韓嘉訥為平章
據宰相表改

丁卯湖南徭賊竊發有司不以

聞詔罪之是月滿濟勒噶台薨召托克托還京師十二
月庚午以中書左丞相多爾濟為右丞相平章政事太
平為左丞相丙子以連年水旱民多失業選臺閣名臣
二十六人出為郡守縣令仍許民間利害實封呈省

丙戌中書省臣建議以河南盜賊出入無常宜分撥達
勒達軍與揚州舊軍於河南水陸關隘戍守東至徐邳
北至夾馬營遇賊掩捕從之是歲置中書議事平章四
人

八年春正月戊戌朔以額森特穆爾知樞密院事辛亥
詔翰林國史院纂修后妃功臣列傳學士承旨張起巖
學士楊宗瑞侍講學士黃潛為總裁官左丞相太平左
丞呂思誠領其事是月湖廣行省右丞桂齊湖南宣慰

都元帥諤勒哲特穆爾討莫盤洞諸蠻縛其洞首楊鹿
五赴京師二月壬辰復立布達烏爾圖莽果三處屯田
是月以前奉使宣撫賈惟貞稱職特授永平路總管詔
濟寧鄆城立行都水監以嘉魯為都水監三月丁酉詔
以東帛旌郡縣守令之廉勤者遼東薩古納反詐稱大
金子孫碩達勒達路托克托和斯唐古和爾果斯討擒
之壬寅土番盜起有司請不拘資級委官討之福建盜
起詔汀漳二州立分元帥府轄之己未遣使詣江浙江

西湖廣四川雲南銓福建番廣蠻夷等處官選辛酉遼陽烏雅博囉罕妄稱大金子孫作亂官軍討斬之是月吳天保復寇沅州夏四月乙亥帝幸國子學賜衍聖公銀印升秩從二品定弟子員出身及奔喪省親等法詔守令選立社長專一勸課農桑京官三品以上歲舉守令一人守令到任三月亦舉一人自代其諤德齊拱衛百戶不得授縣達嚕噶齊止授佐貳久著廉能則用之丁丑遼陽董哈喇作亂鎮撫奇徹討擒之己卯海寧州

沐陽縣等處盜起遣翰林學士圖沁布哈討之是月帝
如上都命托克托為太傅湖廣行省左丞章巴延引兵
捕土寇莫萬五蠻雷等已而廣西峒賊乘隙入寇巴延
退走六月丙戌立司天臺于上都秋七月丙申朔日有
食之辛丑復立五道河屯田壬子量移竄徙官于近地
安置死者聽歸葬乙卯遣使祭曲阜孔子廟丙辰以阿
拉克布哈為大司徒八月帝還大都冬十一月辛亥吳
天保掠全州是歲台州方國珍為亂聚衆海上命江浙

行省參知政事多爾濟巴勒討之

九年春正月乙巳廣西徭賊復陷道州萬戶鄭均擊走之丙午命中書平章政事台哈布哈提調會同館三月河北潰吳天保復寇沅州夏四月丁丑以知樞密院事竒徹台為中書平章政事己卯以燕南廉訪使韓元善為中書左丞壬午以河間鹽運司水災住煎鹽三萬引是月帝如上都五月戊戌命托克托提調太鄂爾多內史府庚子詔修黃河金堤民夫日給鈔三貫庚戌命翰

林國史院薦舉守令官丙辰定守令督攝之法路府州
縣以次督攝秋七月庚寅監察御史沃呼海壽劾奏殿
中侍御史哈瑪爾及其弟舒蘇罪惡御史大夫韓嘉訥
以聞不省章三上詔奪哈瑪爾舒蘇官出海壽為陝西
廉訪副使韓嘉訥罷為宣政院使壬辰命太子阿裕爾
實哩達刺習學漢人文書甲午以額森特穆爾為御史
大夫乙未以湖廣行省左丞相琳沁巴勒知樞密院事
甲寅以巴延為集賢大學士乙卯罷右丞相多爾濟依

前為國王左丞相太平為翰林學士承旨閏月辛酉以
托克托為中書左丞相仍太傅韓嘉訥為江浙行省平
章政事庚午以伊克扎爾固齊吹斯戩為中書右丞同
知樞密院事伊蘇烏爾圖罕為中書參知政事八月甲
辰以集賢大學士巴延為中書平章政事河南行省平
章政事伊嚕布哈為宣政院使庚戌以司徒雅克布哈
提調太史院知經筵事是月帝還大都九月甲子詔凡
建言中外利害者委官選其可行之事以聞冬十月丁

酉命皇太子阿裕爾實哩達喇入端本堂肄業以托克
托領端本堂事司徒雅克布哈知端本堂事十一月戊
午朔日有食之十二月丁未吳天保陷辰州是歲詔汰
冗官均俸祿賜致仕官及高年帛

十年春正月丙辰朔以中書右丞吹斯戩為平章政事
伊蘇烏爾圖罕為中書右丞壬戌立四川容美洞軍民
總管府夏四月己丑左司都事武祺建言更鈔法丁酉
大赦是月帝如上都秋八月壬寅帝還大都九月壬午

托克托以吏部選格條目繁多莫適據依銓選者得以高下之請編類為成書從之冬十月乙未吏部尚書諤勒哲圖建言更鈔法命中書省御史臺集賢翰林兩院之臣集議之辛丑置諸路寶泉都提舉司于京城是月大名東平濟南徐州各立兵馬指揮司以捕上馬賊十一月壬子朔日有食之辛酉罷遼陽濱海民煎熬野鹽已已詔天下以中統交鈔壹貫文權銅錢一千文準至元寶鈔貳貫仍鑄至正通寶錢並用以寶鈔法至元寶

鈔通行如故十二月壬午朔修大都城辛卯以大司農
圖嚕等兼領都水監集河防正官議黃河便益事命前
同知樞密院事布延布哈等討西徭賊己酉方國珍攻
温州

十一年春正月庚申命江浙行省左丞博囉特穆爾討
方國珍二月立湖南元帥府分府于寶慶路三月庚戌
立山東分元帥府于登州壬戌徵建寧處士彭炳為端
本堂說書不至夏四月壬午詔開黃河故道命嘉魯以

工部尚書為總治河防使發汴梁大名十三路民十五萬廬州等戍十八翼軍二萬自黃陵岡南達白茅放于黃固哈只等口又自黃陵西至陽青村合于故道凡二百八十里有奇仍命中書右丞伊蘇烏爾圖罕同知樞

密院事哈斯以兵鎮之

宋濂曰先異童謠云石人一隻眼挑動黃河天下反及嘉魯治

河果于黃陵岡掘得石人一眼而汝潁冠起議者謂天下之亂皆由嘉魯治河之役勞民動衆所致不知元之亡實基于上下因循紀綱廢弛設不興是役亂詎無從起乎伏讀通鑑輯覽

御批許濂之論為確當而責當日君臣既興大役不籌萬全失寓賑於工之良法蓋誠經國之不善無徒藉口

謠言以成敗論
事也謹錄識之

乙酉加封河瀆神為靈源神祐弘濟王
仍重建河瀆及西海神廟辛丑師壁安撫司土官盤順
府土官降立長官司四巡檢司七是月帝如上都五月
己酉朔日有食之辛亥潁州妖人劉福通作亂以紅巾
為號陷潁州初樂城人韓山童祖父以白蓮會燒香惑
衆謫徙廣平永年縣至山童倡言天下大亂彌勒佛下
生河南及江淮愚民皆翕然信之福通與杜遵道羅文
素盛文郁王顯忠韓咬兒復鼓妖言謂山童實宋徽宗

八世孫福通等殺白馬黑牛誓告天地欲同起兵為亂
事覺縣官捕之急福通遂反山童就擒其妻楊氏同子
韓林兒逃之武安壬申命同知樞密院事圖沁以兵討
劉福通六月劉福通據朱臯攻破羅山真陽確山遂犯
舞陽葉縣等處江浙左丞博囉特穆爾為方國珍所敗
秋七月丁巳罷四川大奴管勾洞長官司改立忠孝軍
民府是月開河功成乃議塞決河命大司農達實特穆
爾及江浙行省參知政事樊執敬浙東廉訪使董守愨

同招諭方國珍八月丙戌蕭縣李二及老彭趙君用攻
臨徐州李二號芝蔴李與其黨亦以燒香聚衆而反是
月帝還大都蘄州羅田縣人徐貞一名壽輝與黃州麻
城人鄒普勝等以妖術陰謀聚衆遂舉兵為亂亦以紅
巾為號九月戊申以中書平章政事多爾濟巴勒提調
宣文閣和經筵事平章政事烏珠提調會同館事壬子
以御史大夫額森特穆爾知樞密院事及衛王庫春格
爾總率大軍討河南妖寇壬戌詔以高麗國王布達實

哩之弟巴延特穆爾襲其王封布達實哩之子遂廢是月劉福通陷汝寧府及息州光州徐壽輝陷蘄水縣及黃州路冬十月癸未立寶泉提舉司于河南行省及濟南冀寧等路凡九江浙江西湖廣行省等處凡三命知樞密院事婁章以兵同額森特穆爾討河南妖寇是月徐壽輝據蘄水為都國號天完僭稱皇帝十一月治河功成遣使告祭河伯召嘉魯還朝起授集賢大學士賜托克托達爾罕之號俾世襲之命立河平碑十二月己

卯立河防提舉司隸行都水監丙戌以治書侍御史烏克遜良楨為中書參知政事辛丑額森特穆爾復上蔡縣擒韓咬兒等至京師誅之

按額森特穆爾復上蔡縣通鑑綱目載在九月與此

異

十二年春正月戊申竹山縣賊陷襄陽路總管柴肅死之是日荆門州亦陷庚戌以宣政院使伊嚕布哈為中書平章政事壬子中書省臣言河南陝西腹裏諸路供給繁重調兵討賊正當春首耕作之時恐農民不安田

畝守令有失勸課宜委通曉農事官員分道巡視督勸
守令親詣鄉都省諭農民依時播種務要人盡其力地
盡其利其有曾經盜賊水患供給之處貧民不能自備
牛種者所在有司給之仍令總兵官禁止屯駐軍馬毋
得踏踐以致農事廢弛從之丙辰徐壽輝陷漢陽丁巳
陷興國府己未陷武昌威順王庫春布哈湖廣行省平
章政事和尚棄城走辛酉徐壽輝陷安陸府知府趙爾
死之辛未徐壽輝兵陷沔陽府推官俞述祖死之壬申

中興路陷是月拘刷河南陝西遼陽三省及上都大都
腹裏等處漢人馬命四川行省平章政事伊魯特穆爾
為總兵官與四川行省右丞昌吉討興元金州等處賊
宣政院同知僧格率領伊都呼輝和爾軍與荆湖北道
宣慰使多爾濟巴勒同守襄陽濟寧兵馬指揮使寶通
統領右都衛軍從知樞密院事伊徹察喇討徐州賊二
月丁丑以集賢大學士嘉魯為中書添設左丞以河南
廉訪使哈喇多爾濟為荆湖北道宣慰使都元帥守襄

陽癸未命諸王圖沁守揚州命寧王英寶鎮四川乙酉
徐壽輝陷江州總管李黼死之遂陷南康路丙戌徐壽
輝陷岳州房州賊陷歸州戊子置安東安豐分元帥府
辛丑鄧州賊王權張椿陷澧州龍鎮衛指揮使溫都爾
哈瑪爾等復之褒贈死義宣徽使特穆爾等二十七人
壬寅以御史大夫納琳為江南行臺御史大夫仍太尉
命翰林學士承旨巴拉與諸王布呼齊領軍守大名癸
卯命中書平章政事伊魯布哈知經筵事左丞嘉魯參

知政事特哩特穆爾烏克遜良楨並同知經筵事是月賊侵滑濬起德琳為河南右丞守東明徐壽輝陷袁州命特哩特穆爾以中書參知政事分省濟寧定遠入郭子興起兵自稱元帥與其黨孫德崖等破濠州三月丁未徐壽輝攻衡州洞官黃安撫敗之陶九陷瑞州總管約蘇北萬戶張岳敗之壬子河南平章台哈布哈復南陽癸丑行納粟補官之令甲子徐壽輝陷饒州路遂陷徽州信州四川未附生蠻向亞甲洞主墨得什周出降

立盤順府丁卯出幣帛於迤北萬戶千戶所易馬戊辰詔南人有才學者依世祖舊制中書省樞密院御史臺

皆用之

按續通鑑綱目詔省臺官兼用南人自世祖以後臺省之職南人斥不用至吳始復舊制凡南

人有才學者並許用之所載較此為詳

中書省臣言張理獻言饒州德興

三處膽水浸鐵可以成銅宜即其地各立銅冶場直隸

寶泉提舉司宜以張理就為銅冶場官從之以江浙行

省左丞相琳沁巴勤為江西行省左丞相領兵收捕饒

信賊庚午詔隨朝諸正官各舉循良材幹智勇兼全堪

充守令者二人多者不限員數試用守令並兼管義兵
防禦諸軍鄂羅勸農事是月方國珍復劫其黨下海入
黃巖港台州路達噶噶齊台哈布哈率官軍與戰死之
閏月壬午以大理宣慰使達實巴圖爾為四川行省添
設參知政事與本省平章政事耀珠討山南湖廣等處
賊乙酉徐壽輝陷安吉路鄉民羅明遠起兵復之命工
部尚書道喇兵部侍郎瑪們和卓分詣上都察罕淖爾
集寧等處給散出征河南達勒達軍口糧立淮南江北

等處行中書省治揚州兼轄高郵淮安滁州和州廬州
安豐安慶蘄州黃州壬辰以大都留守諤格實為江浙
行省添設右丞討饒信賊丁酉湖廣行省參知政事鐵
傑以湖南兵復岳州戊戌詔淮南行省設官二十五員
以翰林學士承旨鴻和爾布哈湖廣平章政事實勒們
並為平章政事淮東元帥曼濟為右丞燕南廉訪使秦
從德為左丞陝西行臺侍御史達實多山北廉訪使趙
璉並為參知政事庚子以樞密副使烏蘭哈達為中書

添設參知政事同知經筵事是月詔四川行省平章政
事權珠以兵東討荆襄賊復忠萬夔雲陽等州命江西
左丞相琳沁巴勒守江東西關隘諸王琳沁巴勒安班
參政額森特穆爾與陝西平章伊嚕特穆爾討南陽襄
陽賊刑部尚書阿嚕討海寧賊江西右丞和尼齊與參
政托迪討江西賊浙東宣慰使沃聶布守蕪湖江西右
丞諤格實江浙左丞羅羅與桑節巴延特穆爾曼濟哈
雅同討饒信賊方國珍不受招安之命命江浙左丞尊

達實哩討之額森特穆爾駐軍沙河軍中夜驚軍潰退
屯朱仙鎮詔以中書平章政事曼濟代總其兵額森特
穆爾還京師仍命為御史大夫夏四月癸卯朔日有食
之江西臨川賊鄧忠陷建昌路甲寅以御史大夫吹斯
戩為中書平章政事提調留守司丙辰江西宜黃賊塗
佑與邵武建寧賊應必達等攻陷邵武路千戶魏淳以
計擒之復其城辛酉四川參政僧格實哩復渠州辛未
荆門知州聶炳復荆門州是月帝如上都永懷縣賊陷

桂陽耀珠復歸州進攻峽州與峽州總管趙余禴大破賊兵誅李太素等遂平之詔天下完城郭築隄防命伊都呼伊魯特穆爾領輝和爾軍馬同豫王喇特納實哩知樞密院事婁章討襄陽南陽鄧州賊陝西行臺御史蒙果勒哈雅范文等糾額森特穆爾喪師辱國乞明正其罪詔不允左遷西臺御史大夫多爾濟巴勒為湖廣平章蒙果勒哈雅十二人為各路添設佐貳官五月戊寅命龍虎山張嗣德為三十九代天師海道萬戶李世

安建言權停夏運從之己卯權珠復中興路庚辰監察御史齊齊克特穆爾等言河南諸處羣盜輒引亡宋故號以為口實宜以瀛國公子和尚趙完普及親屬徙沙州安置禁勿與人交通從之罷茨兒棚等處金銀場課癸未建昌民戴良起鄉兵克復本路乙酉命留守特默格與諸王多爾濟守口北龍慶州是月達實巴圖爾至荆門增募兵趨襄陽與賊戰大敗之命尊達實哩仍守蕪湖險隘六月丙寅紅巾周伯顏陷道州秋七月庚辰

饒徽賊犯昱嶺闖陷杭州路

按續通鑑綱目徐壽輝遣項善畧引兵掠饒徽諸州

遂犯昱嶺闖攻杭州城中猝無備參政樊執敬死之時濟寧路總管董搏霄從江浙平章嘉瑄征安豐奉命移軍援江南遂渡江幸兵復之較此倍詳 辛巳命通政院使達爾瑪實哩與

樞密副使圖沁布哈討徐州賊已丑湘鄉賊陷寶慶路

庚寅托克托請親出師討徐州詔許之辛卯以托克托

台為行樞密院使提調二十萬戶丁酉以杜秉彝為中

書添設參知政事湖南元帥副使蘇爾約蘇哈雅總管

烏雅思忠復寶慶路是月徐壽輝陷福安寧德等縣八

月甲辰以同知樞密院事哈瑪爾為中書添設右丞丁己以中書平章政事布哈知經筵事扎克托將出帥尚書穆爾瑪哈穆特等上言大臣天子之股肱中書庶政之根本不可以一日離乞詔留之不報丁卯詔扎克托以達爾罕太傅中書右丞相分省于外督制諸處軍馬討徐州省院臺分官屬從行稟受節制即日發京師是月帝還大都安陸賊將俞君正復陷荊門州知州聶炳死之賊將党仲達復陷岳州九月乙亥俞君正復陷中

興權珠領兵與戰於樓臺敗績奔松滋本路判官紳圍
死之癸未中興義士范中偕荆門僧李智復中興路俞
君正敗走龍鎮衛指揮使温都爾哈瑪爾領兵入城耀
珠自松滋還屯兵于石馬乙酉托克托至徐州辛卯托
克托復徐州屠其城李二遁走己亥賊攻辰州達魯噶
齊和尚擊走之庚子詔加托克托為太師班師還京冬
十月庚戌以平章昂珠右丞哈瑪爾同知經筵事十一
月辛未命江浙平章慶通收捕常州賊乙亥以桑節為

江西平章擊徐壽輝兵于湖口敗績死之癸未命江浙行省右丞特哩特穆爾總兵討方國珍十二月壬寅達實巴圖爾復襄陽辛亥詔以抗常湖信廣德諸路皆克復赦註誤者蠲其夏稅秋糧命有司撫恤其民癸亥托克托請興近畿水利召募江南人耕種歲可得粟麥百萬餘石不煩海運而京師足食帝曰此事有利於國家其議行之是歲海運不通立都水庸田使司于汴梁掌種植之事潁州沈邱人察罕特穆爾與信陽州羅山人

李思齊同起義兵破賊有功授察罕特穆爾中順大夫
汝寧府達魯噶齊李思齊知汝寧府



欽定續通志卷六十九